

KANYE KATSA Kanye Katsa Foletsa Kĩ Benye Betsa Yohanes

I Ovoli kīi kame foletsa nye Yesu Kristo kanye katsa a kī Baguma kpa ye, kī enye etsa ye basumune ne fotsa a kī kene kī foya ne loko lukū kame a akū. Kristo tsā ye ode foto onyane akū efō ye osumune Yohanes nyi fotsa kīi flee.

II Yohanes leme le foletsa a kī emo a flee. Edi adansie ne Baguma kale a mo onokoli kale a kī Yesu Kristo nye etsa ye a akū.

III Baguma ahila oti a kī yakā ovoli kīi, mo bati a kī batse foletsa a kī bele biyi, kī bekena ne foe akū leme a, kitonekī loko a wo oto kī fotsa kīi flee foya ne foe kame.

Yohanes Wōna Tesoli Evūkono a.

IV Yī, Yohanes, lamena foletsa kīi katsele kamena mi tesoli evūkono a kī tidei ne Asia amantam kame a.

Baguma kī edzi nkpā, kī ena kokoe, kī yaaya a, emo mi konya, ekpa mi lukudo. Ade ayea hūhū evūkono a kī edzē ne ye legākpo ane a,

V mo Yesu Kristo onokoli odansini, kī enye bati a kī Baguma dzela etomena kanokpa kame otonyade, kī yanya tite akū fogā flee akū a, bemo mi konya bekpa mi lukudo leme.

Yawe boe kale ade etsā ye wuda kame enye boe etomena tokpa kame.

VI Oti a kī eyi legākanyakō ekpa boe kī bonya basofu busum ye Baguma mo Olega a, ade ye mo

mikɔa kukũkpale mo kɔbẽ mikpa daa daa! Fɔya lomo.

VII Midã, etsẽ ne luflututu akũ yaya!

Odi nye odi aamo ye,

ade bati a kĩ betsoe ye lotsɔe ne seklabi a leme aamo ye.

Tite akũ bati flee aawula babe yoo ne ye akũ!

Ade aye kene kĩ fona a!

Fɔya lomo.

VIII Boe Olate, Baguma Kpale, kĩ edzi nkpã, kĩ ena kɔkɔe, kĩ yaaya a, le kĩ, “Yĩ nye Otɔnyade mo Owũnade.”

Kristo Kanye Katsa.

IX Yĩ, Yohanes, mi ɔwaẽ kĩ bɔmó mi bɔtsã butomena Yesu a, ñnye mi ɔkɔba kĩ bɔdɔla boe akũ, bɔmó lubo a kĩ laya kakpa bikĩ benye ye ode legãkanyakõ bade a. Bekɔa yĩ benadzina ne tite ne mui kayite a kĩ bave Patmos a akũ, kitonekĩ nde letsã ne Baguma kale a, mo ɔnɔkɔali a kĩ Yesu nye etsa a akũ sũ.

X Ne boe Olate Luwi a akũ ni, Hũhũ a te yĩ kame, ade nnu odo kɔɔba kĩ ené nde kagbulee aye, ade ekale kɔdzela ne yĩ liti a.

XI Odo a le kĩ, “Tsele letsa a kĩ ɔmó a kayi, lɔkɔa kakɔa ovoli a kamena tesoli a kĩ tideĩ ne temato tekpale tekpale evũkɔnɔ kĩĩ kame. Ade te nye Efeso, Smirna, Pergamo, Tiatira, Sardis, Filadelfia mo Laodikea a.”

XII Ndani ane kĩ madã oti a kĩ elamena yĩ kale kabi a, ade mmó sika ngbã ɔsedza titse evũkɔnɔ a.

XIII Litsedi kī lēla nde Otidziwa Obi aye kī edo atadie wulaa kī eka eko ne ye foneta, ade ekōa sika ngbā abōso ebōa ne owōle a.

XIV Ye lolō tōlō voe fitaa nde kuveli tetsā iye nde ledāglegle aye, ade ye banebi ata nde fi luwotu aye a.

XV Ye foneta ata nde kōoble kī bevole ne fi kame, ade ye odo ane nde owō mui kī baka kato otō akū kako waa ne lutubu kame a.

XVI Enēē fusibii evūkonō ne ye sōmōna awe, ade atugbe mō obō lēme ne eto ye onukpē kame a, ade ane kame amōane nde suwa ketee aye a.

XVII Kī mmó ye a, nné ntō ne ye abōa kame nde oti kī eku, ade ekōa ye sōmōna awe ete ne yī akū ele kī, “Tavila! Yī nye Otōnyade mō Owūnade,

XVIII mō oti a kī edzi nkpā! Nku tō lēme finyaa ndzi nkpā daa. Wuda mō kanokpade tesafi deī ne yī awe.

XIX Foesū tsele fōtsa a kī omó, fukī fudeī finyaa mō fukī fōaya ne foe kame ke liti a kayi.

XX Kale kolawa kī kideī ne fusibii evūkonō a kī omó ne yī sōmōna awe, mō sika ngbā osedza titse evūkonō a kayō nye. Fusibii evūkonō a nye tesoli evūkonō a ode fōtō banyane, ade osedza titse evūkonō a lēme nyé tesoli evūkonō a.”

II

Baguma Oledo a Kī Ekpa Efeso Asoli a.

¹ “Tsele fōletsā kī kama Efeso asoli a ode fōtō onyane a.

Ade oti a kī epini fusibii evūkonō ne ye sōmōna, kī etsē ne sika ngbā osedza titse evūkonō kayite a oledo ne awī a.

II Ìnyina nò adzuma flee mò ayekĩ obòà mbòdi odo ɔwòlɛ ɔmó lubo. Ìnyina kĩ aáwɛ bati kpa fòletsà kalɛ. Ɔsò bati a kĩ bawɛ be akũ kĩ fòtò banyanɛ lɛmɛ benyɛ́ fòtò banyanɛ a ɔdã, ade ɔmó oyi ɔsũ kĩ bavãlɛvã banɛ a.

III Ìnyina ayekĩ ɔna ɔwòlɛ bɔɛɛ ɔmó lubo nɛ yĩ sũ, lɛmɛ akpò táveli nò.

IV Lɛmɛ ndeĩ kalɛ kadi nɛ nò akũ. Ade ke nyɛ kĩ aáwɛ yĩ kalɛ finyaa ndɛ ayekĩ ɔnya loto ɔwɛ yĩ kalɛ a.

V Nɛ foesũ ni, te anɛ nɛ nò kadzakõ a kĩ ɔdza oto ɔtò a akũ! Dani ɔwòlɛ kame lɔkòà kakɛna lɛtsa a kĩ ɔnya loto ɔkɛna a. Ntɛ ɔtádani ɔwòlɛ kame kõ ni, maaya nɛ nò sɛkẽ ìyaabɔɛ nò ɔsɛdza otse a nɛ ye kadzakõ.

VI Lɛmɛ lɛtsa a kĩ odeĩ kĩ lawo yĩ anɛ nyɛ kĩ akesĩ Nikolatiafò fòkɛlatsa ndɛ ayekĩ yĩ malo kakesĩ foe a.

VII Oti a kĩ edeĩ atò ni, etse lɛtsa a kĩ Hũhũ a lamɛna tɛsoli a kabi,

Oti a kĩ enya akũ ni, maakpa ye nkpã kutse a kĩ kɔdzẽ nɛ Baguma kòbã a kĩ bawɛ Paradiso a kame babi badi enya.”

Ɔlɛdo a Kĩ Ekpa Smirna Asoli a.

VIII “Tselɛ fòletsà kĩ kama Smirna Asoli ode fòtò ɔnyanɛ a.

Ade ɔlɛdo kĩ eto oti a kĩ enyɛ Ɔtonyade mò Owũnade, oti a kĩ eku lɛmɛ ebuki edzi nkpã a sɛkẽ nɛ awĩ a.

IX Ìnyina nò ɔhau flee. Ìnyina kĩ ohiãni anɛ lɛmɛ nɛ ɔnòkòali kame ni, osikani anɛ! Ìnyina tuwuli kpa a kĩ bikĩ bawɛ be akũ Yudafo lɛmɛ

benyé Yudafo a, ale ne no akū. Benye Abonsam katsu a kame bati.

^X Tavila lubo lidi nye lidi kī laaya ne no akū a kamō. Dā! Abonsam aafō bipili mi kame badi bido ne kola eso mi edā, ade míamō lubo fuwi ewua a. Di onokwali kakpa yī nte fōanya wuda malo, lōkwa maakpā no nkpā nde akū kanya legābōe aye.

^{XI} Oti a kī edeī ato ni, etse letsa a kī Hūhū a lamena tesoli bati a kabi!

Bati a kī baanya akū ni, wuda ayade a lelāatamō be.”

Oledo a Kī Ekpa Pergamo Asoli a.

^{XII} “Tsele fōletsa kī kama Pergamo Asoli a ode fōto onyane a kī,

Ade oti a kī enee atugbe mō obō a fōletsa ne awī a.

^{XIII} Īnyina no kadzikō ne awā kī Abonsam legākpo a deī a. Opini yī dī mō osī mō osī. Lōkō a kī bekō Antipa, yī odansini mō onokwalini ne mi kame ne awā kī Abonsam dzi malo ni, otāmuniki ne yī liti, mbom ote yī odo.

^{XIV} Leme ndeī no akū fōletsa sukuloo. Bati badi deī ne mi kame kī bitomō Balam fōtsa katsa. Ade Balam kī letsa Balak tisi ekpā Israelfō edo ne tōkpa kame, ade efō benya funitsā kī beto bekpa baviō, ade bebōa adōpaa a.

^{XV} Ade ayea odeī bati badi ne mi kame kī bitomō Nikolatiafō fōtsa katsa liti a.

^{XVI} Finyaa, dani owole kame! Nte nné aye ni, maaya ne no akū moatse nkwa lepame a kī lideī ne yī onukpē kame a nno mō bati a.

XVII Oti kī edeĩ ato ni, etse letsa a kī Hūhū a lamena tesoli bati a kabi. Oti a kī enya akū ni, maakpa ye mana a kī bekōa bekōla a adi enya. Bio maakpa ye de fitaa kī betsele dī vōē bite ne de akū. Odima linyina dī a, mboente owula a kī ete de a odi.”

Olodo a Kī Ekpa Tiatira Asoli a.

XVIII “Tsele foletsa kīĩ kamena Tiatira Asoli a ode foto onyane kī,

Ade foletsa a kī futo Baguma Obi, kī ye ane atē nde fi luwotu aye, ade ye aboa leme amoane nde kooble kī bevole tsolitsoli a ne awī a.

XIX Īnyina nō adzuma a kī okena. Īnyina nō odo, nō katekado, nō osum, mō ayekī odeĩ owole boe. Īnyina kī olamena adzuma kakena finyaa kaba ayekī okena ne kayokayi a.

XX Leme kale a kī ndeĩ ne nō akū a nye kī okpa otsole Isabel a kī yave ye akū Baguma onukpē onyene osi, kī yatsa yī basumune fotsa, ade yake be kī bebōa adōpaa, benya funitsā kī beto bekpa baviō a.

XXI Nkpa ye loko kī edani owole kame, leme yaáwe kī yafō adōpaa kabōa.

XXII Foesū maafō ekaho ne okena akū, awā kī bemō bikī babōa adōpaa a, nte betādani towole kame finyaa ni, baamō lubo mō osī mō osī.

XXIII Maako bikī bitomō ye a flee lokoa asafu a flee linyi kī yī nye oti a kī enyina oti owole mō ye lolō kame yededeede. Maase mi kame odi nye odi koto ne ye adzuma a kī ekena a onukpē.

XXIV Leme mi Tiatira bati nkae a kī mitáte Isabel fotsa katsa a, mō mi a kī mitákole fotsa

a kī bave Abonsam kadikanyi dzununuunu a kō ni, minu kī nláalola mi fólotsa bebã.

XXV Leme mipi letsa a kī mideĩ a mo ɔsĩ mo ɔsĩ kenaawo kī maaya.

XXVI-XXVII Oti a kī epi yĩ adzuma a kī mawe edomo akū kenawo kawūna, mo enya akū ni, maakpa ye otumi a kī nte ntomena Nda sekẽ a. Maakpa ye otumi ne fude fude akū, ekɔa sobotsae otse ekpã be, lokɔa ebubuli be nde ayekĩ babubuli lúbui a.

XXVIII Ade maakpa ye odenyinawi lisibii a.

XXIX Oti a kī edeĩ ato ni, etse fólotsa a kī Baguma Hũhũ a lamena tesoli bati a kabi.”

III

Ɔledo a Kĩ Ekpa Sardis Asoli a.

I “Tsele fólotsa kī kamena Sardis Asoli a ode foto ɔnyane a kī,

Oti a kī enee Baguma Hũhũ evũkɔno mo fusibii evũkɔno a fólotsa nye fukĩ,

Ɔnyina no adzuma a kī ɔkena a. Ɔnyina kī ote dĩ kī odzi nkpã, leme oku.

II Ne foesũ nyinya, kado letsa a kī lite ne no kame a kī laaku a kɔbẽ. Kitonekĩ mmó kī letsa a kī ɔkena a tákpola tĩ ne yĩ Baguma ane.

III Foesũ te ane ne letsa a kī betsa no, mo letsa a kī onu a akū, kakena ne foe akū, kadani ɔwole kame. Nte ɔtányinya ni, maayawo ne no akū nde oyekpane aye, ade ɔláanyi lokɔ a kī maawo ne no akū a malo a.

IV Leme mi kame badi sukuloo deĩ ne Sardis kī betádo be tetadie tuduli. Baado tetadie ovoe bomo be bɔtsã, kitonekĩ bekpola bekpá foe.

^V Owula a kī enya akū ni, yaado ye tetadie ovoe lomō, ade nláawola ye dī ñnye ne nkpā badzine ovoli a kame. Maanye ye ntsa ne kanade ne Nda mō ye ode foto banyane ane kī yī ode yane.

^{VI} Oti a kī edeī ato ni, etse foletsa a kī Hūhū a lamena tesoli bati a kabi.”

Ɔledo a Kī Ekpa Filadelfia Asoli a.

^{VII} “Tsele foletsa kī kama Filadelfia Asoli a ode foto onyane a.

Ade foletsa a kī futo oti kpalewa mō onokwalini a kī enee Legā Dawid safi a ne awī a. Nte ebinya kola ni, odima leláapuli ebale koe, ade nte ebale koe leme ni, odima lápuli kabinya koe.

^{VIII} Ñnyina nō adzuma a kī okena a. Mbinya opunu ñyi ne nō loto kī odima leláapuli ebale ye. Ñnyina kī odeī kobē kabii, leme otomō yī fotsa katsa, ade otámuniki ne yī liti a.

^{IX} Dā! Bati katsu kadi deī kī kenye Satana kade, bavālevā a kī bale kī benye Yudafō leme benyé Yudafō a. Maafō beyaake aduli ne nō ane, lokōa be flee binyi kī mawe nō kale.

^X Ne ayekī odo owole okena ne yī kale akū, omō lubo sū ni, yī malo maanye nō ntomena sohuiē lokō a kī laaya ne katinya kame flee, kī baaso bati flee bedā a.

^{XI} Maaya moatsē. Pi letsa a kī lideī ne nō awe a mō kōba, ayekī odima leláate nō akū kanya legābōe a ne nō awe.

^{XII} Maakena oti a kī enya akū a nde luku edza ne Baguma Asoli kola a kame. Yaadza ne awā daa

kĩ eláabuki ené ne awã da. Maatsɛle yĩ Baguma dĩ, mo yĩ Baguma omato dĩ kĩ lenye Yerusalem voẽ a kĩ eka eto ode a nte ne ye akũ. Maatsɛle yĩ moawe dĩ voẽ lɛmɛ nte ne ye akũ.

XIII Oti a kĩ edeĩ ato ni, etse foletsɛ a kĩ Hũhũ a lamena tesoli bati a kabi.”

Ɔlɛdo a Kĩ Ekpa Laodikea Asoli a.

XIV “Tɛle foletsɛ kũĩ kakoa kamena Laodikea Asoli a ode foto onyane a kĩ,

Ade oti a kĩ enye Foya lomo, kĩ enye onokoli odansini wĩ a, kĩ ye nye fotsa a kĩ Baguma boa katokõ a foletsɛ ne awĩ kĩ,

XV Ñnyina no adzuma a kĩ okena a. Ñnyina kĩ otádo, ñye olá ovio. Mawe kĩ ado, ñye ona ovio kufe!

XVI Lɛmɛ ne ayekĩ adã bloblo, kĩ otádo ñye olá ovio lɛmɛ sũ ni, maatua no ntomena yĩ onukpẽ kame nwula!

XVII Ale kĩ, ‘Nna akũ, ndeĩ letsɛ nye letsɛ, ade ntásĩ letsama lɛmɛ a.’ Lɛmɛ onyina ayekĩ okena pasapasa, mo ayekĩ no akũ ako konya. Onye ohiãni, odzi odzo, ade onye onekune a.

XVIII Foesũ made no kĩ ya sika ngbã kĩ binyinyina ne fi kame katomena yĩ sekẽ, ayekĩ aadani osikani. Ya lima ovoe lɛmɛ kasua akũ, ayekĩ beláamo no konyoã odzo a. Ya ane kugua kado ne banebi kame, ayekĩ aamo foko.

XIX Bati a kĩ mawe kale a ni, makã be ane, ade mavele be soto a. Foesũ miboa mbodi midani towole kame.

XX Mitse! Ndzẽ ne onyukpẽ maboa awe. Nte odi nu yĩ odo mo ebinya kola a ni, maawo ne ye

sekẽ bomo ye bonya, ade ye malo yaanya ne yĩ sekẽ a.

^{XXI} Oti a kĩ enya akũ ni, maafõ edzi ne yĩ owẽ ne yĩ legãkpo akũ, nde ayekĩ yĩ malo ñya akũ ndzi ne Nda owẽ ne ye legãkpo akũ a aye.

^{XXII} Oti a kĩ edeĩ ato ni, etse folets a kĩ Hũhũ a lamena tesoli a kabi!”

IV

Ayekĩ Basum Baguma Ne Ode.

^I Fukĩ liti a, nna kanyekatsa bebã kadi ade mmó kĩ bibinya opunu odi biyi ne ode a.

Odo a kĩ ñya loto nnu nde kagbulε aye a, kĩ ebi yĩ tuwuli tã a le kĩ, “De kaya ne ode ne awĩ, lokoa ntsa no fotsa a kĩ kenε kĩ foya ne foe kame ne fukĩ liti a.”

^{II} Deedimape Hũhũ wo ne yĩ kame. Ne ode naa, mmó kĩ bike legãkpo lidi kĩ odi dzi ne de akũ.

^{III} Lukpo a akũ odzine akũ ata muamua nde ahuhoe boe bawovoe mo bangbã kĩ bete koya, ade odetó kame sinigbene kĩ se kalekadã la nde toota gõ sinya legãkpo a.

^{IV} Fogãkpo teya-ana bebã keni fusinya legãkpo a, ade banokõẽ teya-ana kĩ bido tetadie ovoe, betsa sika ngbã fogãbõẽ dzi ne foe akũ a.

^V Odetó kame kamane, oplala kakpene, mo fowola koba kane kato legãkpo a kame. Tibia evũkono kĩ tatẽ dzẽ ne legãkpo a ane kame. Ade te nye Baguma Hũhũ evũkono a.

^{VI} Litsedi kĩ ladã nde mpo kĩ bekõa ahuhoe bekena deĩ ne awã ne legãkpo a ane kame. Ye kame kpale kleĩkleĩkleĩ.

Fotsa ɛna kī fudzi nkpā, kī fudeĩ banebi ne liti mo ɔto tsua fusinya legākpo a ne foke ɛna a akū.

VII Fotsa a kī fudzi nkpā a fotoniyade a la nde dzata, foyade a la nde onantsuenyole, folalɛde a deĩ ane nde otidziwa, ade fonade a ane la nde okolie kī yayidza a.

VIII Fotsa ɛna a kī fudzi nkpā a fudi nye fudi deĩ fupoki evū, ade banebi tsena foe kame mo foe akū flee a. Baáfɔ̃ tɔno kasā lenye mo suwa flee kī,

“Boe ɔlate Baguma Kpale, no akū kpale!

No akū kpale, no akū kpale!

ɔna ane kɔkɔɛ, odeĩ finyaa, ade aabuki ɔya a.”

IX Fotsa ɛna a kī fudzi nkpā a sã kamu, obu, mo kɔlekanye tɔno kakpa oti a kī edzi ne legākpo akū, kī edzi nkpā daa daa a. Nte besã te lomo a,

X banokɔẽ tɛya-ana a atsa ane ne tite ne oti a kī edzi ne legākpo akū a ane kame, kasum ye a kī edzi nkpā daa a. Banye be fogãbɔɛ kayi ne legākpo a ɔto kale kī,

XI “Boe ɔlate mo boe Baguma!

No kī kukūkpale, obu mo otumi feta fokpa,
kitonekī no leboa fotsa flee.

ɔboa foe nde ayekī awe a,
ade fudzi ne no kawɛ onukpẽ a.”

V

Bekɔa Ovoli a Bekpa Kavelibi a.

I Fukī liti a, mmó ovoli butawa odi ne oti a kī edzi ne legākpo akū a somona awe. Betsɛɛ fotsa ne ye kame mo liti ade bekɔa koma fotsa evūkono betale ye onukpẽ a.

II Mmó ode foto onyane mo kobe odi ki eboa fowola koba ne ode, evia ki, "Owei lekpolo ki yaapuli ewai koma a, ebinya ovoli butawa a?"

III Leme odima leláa ne ode, ne tite akú, iye ne tite oda ki yaapuli ebinya ovoli a, iye eda ye kame.

IV Mbe paa, kitoneki betamo odima ki ekpolo ki yabinya ovoli a, iye eda ye kame.

V Ade banokoé a kame omoa bi yi ki, "Fó kabe! Dá! Dzata a ki eto Yuda katete kame a, ki enye Dawid kasinu kame obi a nya akú, ki ekpolo ki yawai koma fotsa evukono a ki bekoa betale ovoli a onukpe, ebinya ye leme."

VI Ki nda a, mmó Kavelibi kadi ki kedze ne legakpo a kayite ne fotsa ena a ki fudzi nkpá a kame, ade banokoé teya-ana a sinya ye a. Foda nde kako beko Kavelibi a. Kavelibi a dei tele evukono mo banebi evukono ki fonye Baguma hūhū evukono a ki edo ne tite flee akū a.

VII Kavelibi a naa kenate ovoli a etomena oti a ki edzi ne legakpo a akū a somona awe.

VIII Ki yate ovoli a, fotsa ena a ki fudzi nkpá a, mo banokoé teya-ana a tsa ane ne tite ne Kavelibi a ane kame. Be kame odi nye odi ne osankuo mo sika ngba loda ki biyula mo titsonu mo olé, ki fonye bati a ki Baguma kpale be akū a mpaebó.

IX Besa ono vóé odi ki,
 "No ki lekpolo ki ate ovoli a
 loka owai koma evukono a
 ki bekoa betale ye onukpe a.

Kitoneki no beko,
 ade oka no babane,
 oya bati okpa Baguma a.

Bati ki bito fude nye fude, tide nye tide,

omaĩ nye omaĩ kame,
mɔ batidziwa aholo aholo a kame.

X Ɔkena be legākanyakɔ̃ basofɔ kĩ bisum boe
Baguma,
ade baanya fogã ne tite akũ a.”

XI Ade kĩ mbuki ndã a, nnu ode foto banyane
mpim mpim kĩ beláapuli bekã odo. Bedza
bisinya legākpo a, mɔ fotsa ena a kĩ fudzi nkpã
a, mɔ banɔkoẽ teya-ana a.

XII Ade besã ɔno kɔɔba kĩ,
“Kavelibi a kĩ bekɔ a,
lekɔla kĩ kate otumi, mɔ akũ kana, mɔ
nyansã,
mɔ kobẽ, mɔ obu, mɔ kukũkpale mɔ kamu!”

XIII Adeke nnu kĩ letsa nye letsa a kĩ Baguma
bɔa ne tite mɔ ode, mɔ tite ɔda, mɔ mpo kame,
mɔ fotsa a kĩ fudeĩ ne foe kame a flee lamena ɔno
kasã kĩ,
“Kamu, mɔ obu, mɔ kukũkpale
mɔ otumi fona daa fɔkpa,
oti a kĩ edzi ne legākpo akũ a mɔ Kavelibi
a!”

XIV Ade fotsa ena a kĩ fudzi nkpã a te futuno
kĩ, “Fɔya lomɔ!” Ade banɔkoẽ a tsa ane ne tite
bisum Baguma mɔ Kavelibi a.

VI

*Kavelibi a Wũnya Kɔma Fɔtsa a Kĩ Bekɔa
Betale Ovoli a.*

¹ Ke liti a, mmó kĩ Kavelibi a wai kɔma evũkɔno
a kĩ bekɔa betale ovoli a foe fɔtonyade. Ade nnu
kĩ fotsa ena a kĩ fudzi nkpã a kame fɔmɔa le
kɔdzela nde oplala lekpene kĩ, “Ya!”

II Ndã foko ade mmó ɔponko ovoe odi a. Oti a kī edzi ne ye akū a neɛ kota ne awe, ade bekpa ye legãboe lidi a. Edzi ye ene nde kawū akū ɔnyane aye kī yanaanya akū.

III Ke liti a, Kavelibi a wai koma koyade a, ade nnu kī fotsa a kī fudzi nkpã a foyade a le kī, “Ya!”

IV Ɔponko bebã kī eyoɔle né. Bekpa oti a kī edzi ne ye akū a kobẽ kī enye lukudo ne tite akū, lokoa bati beko be akū akū. Bekpa ye kopã kpale kudi.

V Kavelibi a wai koma kolalede a, ade nnu kī fotsa a kī fudzi nkpã a folalede a le kī, “Ya!” Kī ndã foko a, mmó ɔponko tūūtū odi. Oti a kī edzi ne ye akū a neɛ sobotsae a kī bakoa kakali fotsa a ne awe.

VI Nnu odo odi kī ené eto fotsa ena a kī fudzi nkpã a kayite ele kī, “Kamone looda moa lete luwi moa kotokase, ade fughano tsensi futukū elale fote luwi moa kotokase, leme mitabula kugua mo waĩ kade!”

VII Ke liti a, Kavelibi a wai koma fonade a, ade nnu kī fotsa a kī fudzi nkpã a fonade a le kī, “Ya!”

VIII Kī ndã foko a, mmó ɔponko odi kī ye akū la nde bato aye. Oti a kī edzi ne ye akū a dī nye Wuda ade Kanokpade tomo ye ne liti a. Bekpa be kobẽ ne katinya kame kasẽ kanade a akū, kī bekoa kawũkano, kole, foso kpa mo bayae kpa beko bati.

IX Kī Kavelibi a wai koma kulode a, mmó bati a kī beko, ne ayekī bide letsã ne Baguma kale a akū, mo ayekī bidi adansie ne ke akū sū a tekla ne afolibo atenye a kayo.

X Beboa fowola kooba kī, “Baguma Kpale, oti kpalewa mo onokoalini ane! Loko lowodabe koũ

aadzemo tite akũ bati, lokoa ovele bikĩ beko boe a soto?"

XI Bekpa be kame odi nye odi atadie owoe wulaa ade bibi be kĩ bibuki bidzi beweya sukuloo kenaawo loko a kĩ baakoa be bakoba basumune mo be bawaẽ a kĩ baako nde be aye a lidede bibumo be, ayekĩ kakã a onukpẽ aakpola.

XII Mmó Kavelibi a kĩ ewai koma kuvũde a. Tite kuna mo osĩ mo osĩ, ade suwa dani nde lima owowo tsutsulitsui, odeto leme dani gbãã nde baboane aye a.

XIII Fusibii ka foto ne tite nde ayekĩ owe mo osĩ awili kutse babi bũũ kawula a.

XIV Odetó kame yela nde oyae ovoli kĩ bibuta aye, ade bebole toto mo tite kĩ mui sinya a tidi nye tidi ne te kadzakõ a.

XV Tite akũ fogã, abãã banokoẽ, sodzafõ banokoẽ, asikafõ, otumifõ, bati flee, basate mo bikĩ bidzi be akũ akũ a, bela ne tite teke mo toto akũ boe teke kame.

XVI Ade bebõa fowola bibi toto a kĩ, "Midzuli miko ne boe akũ, lokoa mikola boe ne oti a kĩ edzi ne legãkpo akũ a ane, mo Kavelibi a kalokpa onukpẽ.

XVII Kitonekĩ be kalokpa luwi mo libe a wo oto. Owei aapuli edza ne de onukpẽ?"

VII

Bepau Bati Mpim Jha Tena-ana Ne Israel.

I Fukĩ liti a, mmó ode foto banyane ena kĩ bedzẽ ne tite tukontoũ ena a akũ. Bisua tite akũ owe foko ena a osi, kĩ etavũ ne tite akũ, ãye mpo akũ, ãye ne kutse kudima kame.

II Ade mmó ode fɔtɔ ɔnyane bebã kĩ eto suwa kadekõ yaya, kĩ enee Baguma kĩ edzi nkpã a ɔsũkayi fɔtsa a ne awe. Eboã fowola kooba eve ode fɔtɔ banyane ena a kĩ Baguma kpa kɔbẽ kĩ bekena tite mɔ mpo awɔda a,

III ele kĩ, “Mitakena tite, mpo iye futse letsamano kenaawo kĩ bóakɔa ɔsũkayi fɔtsa buyi boe Baguma basumune a ɔsũ ne be nnye.”

IV Ade nnu kĩ bati a kĩ biyi be ɔsũ mɔ Baguma ɔsũkayi a kĩ bito Israelfɔ futete ewua-nviã kame a lidede nye bati mpim oha tɛna-ana (144,000).

V Ne Yuda katete a kame biyi bati mpim ewua-nviã ɔsũ.

Ruben katete kame bati mpim ewua-nviã.

Gad katete kame bati mpim ewua-nviã.

VI Aser katete kame bati mpim ewua-nviã.

Naftali katete kame bati mpim ewua-nviã.

Manase katete kame bati mpim ewua-nviã.

VII Simeon katete kame bati mpim ewua-nviã.

Levi katete kame bati mpim ewua-nviã.

Isakar katete kame bati mpim ewua-nviã.

VIII Zebulon katete kame bati mpim ewua-nviã.

Yosef katete kame biyi bati mpim ewua-nviã.

Ade ne Benjamin lɛme katete kame biyi bati mpim ewua-nviã ɔsũ a.

Yohanes Mó Bati Kɔdabu Baũ.

IX Fukĩ liti a, mmó bati kɔdabu baũ kudi kĩ odima lelápuli ekã. Bito batidziwa ahɔlo ahɔlo a, kade nye kade, ɔmaĩ nye ɔmaĩ, mɔ tide nye tide flee kame, ade bedza betselamo legãkpo mɔ Kavelibi a. Be flee bido tetadie ovoe wulaa, ade benee tukuo ne awe a.

X Beboá fowola koõba kī, “Nkpā kate a to boe Baguma a kī edzi ne legākpo a akū, mō Kavelibi a sekē!”

XI Ode foto banyane a flee dza bisinya legākpo a, mō banokōē a, mō fotsa ena a kī fudzi nkpā a, ade beka betsa ane ne tite ne legākpo a ane bisum Baguma,

XII bele kī,

“Foya lomō!

Kamu, mō kukūkpaɛ,

mō nyansā, mō kolekanye, obu,

kobē mō otumi

nye boe Baguma fude daa daa!

Foya lomō!”

XIII Banokōē a kame om̃oa odi via yī kī, “Bawei nye bikī bido tetadie ovoe wulaa kī a? Ne ndia bito?”

XIV Nkpa ye mbuaye kī, “Yī ɔlate, ñnyína. Nō nyina.”

Ade ebi yī kī, “Ade be nye bati a kī betsā lubo kamō kpale kame bene soũ a. Bevole be tetadie tivoe fitaa ne Kavelibi baboane a kame.

XV Ade foesū bedzē ne Baguma legākpo a ane basum ye lenye mō suwa flee ne ye Asoli Kola kame a. Oti a kī edzi ne legākpo a akū a, aafō letsama leláakena be ne ye ane kame.

XVI Kole ñye om̃oado leláabuki ekō be da.

Suwa leláapila be ñye ovio libuki ekō be da.

XVII Kitonekī Kavelibi a kī kideī ne legākpo a kayite a nye be okpāne.

Yaakpā be enamena awā kī nkpā mui ane kato a,

ade Baguma aayo babe flee ne be ane a.”

VIII

Kavelibi a Wai Koma Kuvũkõnde a.

^I Kĩ Kavelibi a wai koma kuvũkõnde a, ode kena dũĩ fõana nde dõũhuile seke.

^{II} Ke liti a, mmó ode foto banyane evũkõnõ kĩ badza ne Baguma ane a, ade bekõa kugbulẽe evũkõnõ bido be ne awe a.

^{III} Ode foto õnyane bebã kĩ enee sika ngbã õnyõ kate lubui a né eyadza ne afõlibõ atenyẽ a õwẽ. Bekpa ye tutsonu mõ olẽ beblebee kĩ ekõa ebumõ Baguma bati flee mpaebõ, ekõa ebõa afõlie ne sika ngbã afõlie atenyẽ a kĩ edzẽ ne legãkpo a ane a akũ.

^{IV} Tutsonu a kĩ bite fi a õnyõ, mõ Baguma bati mpaebõ a né ne ode foto õnyane a kĩ edzẽ a awe fude fõnaa Baguma sekẽ.

^V Ke liti a, ode foto õnyane a nye fi ne afõlibõ atenyẽ a kame eyula õnyõ kate lubui a, ade eta foe eko ne tite akũ a. Òplala kpenne kõõba, odetó kame mõane ade tite kuna a.

Ode Foto Banyane a Võ Be Kugbulẽe.

^{VI} Ade ode foto banyane evũkõnõ a kĩ benee kugbulẽe a mane akũ kĩ baavõ be kugbulẽe a.

^{VII} Ode foto õnyane õtonyade a võ ye kagbulẽe a. Letaleta ledãglegle mõ fi kĩ babõane tseka ne foe kame ka fõyako ne tite akũ. Tite kasẽ kame katsu kalalẽde vio, tite akũ futse foe kasẽ kame katsu kalalẽde vio mõ tuwĩ gõ flee vio.

^{VIII} Ode foto õnyane õyade a lemẽ võ ye kagbulẽe a. Beta litsedi kĩ ladã nde õto kpale kĩ ekatẽ mõ fi bido ne mpo kame, ade mpo a kasẽ kame katsu kalalẽde dani babõane a.

IX Fotsa a kī fudzi nkpā ne mpo kame a foe kasē kame katsu kalalēde ku, ade tōkolo a kī titeī ne mui ane a te kasē kame katsu kalalēde bu kade a.

X Ke liti a, ode foto onyane olalēde a vō ye kagbulē a, ade lisibii kpale kī latē nde obia aye to ode layato ne towo kasē kame katsu kalalēde mo mui kanekō kame a.

XI Bave lisibii kī kī tuwī mo onye, ade mui kasē kame katsu kalalēde a dani mo onye mo onye, ade bati beblebee ku a, kitonekī mui a dani otsonu kpa.

XII Ode foto onyane onade a lemē vō ye kagbulē a. Deedimōape bebōa suwa kasē kame kalalēde, odeto kasē kame kalalēde mo fusibii kasē kame katsu kalalēde a. Fukī fō kade kanyina kasē kame kalalēde mo lenye kasē kame kalalēde tána ohaī.

XIII Ke liti a, ndā foko ade nnu okolie odi kī elamena kayidza ne owe kame flee ele mo odo kōba kī, “Bōbōe, bōbōe, bōbōe makpa bati a kī bidzi nkpā ne tite akū nte ode foto banyane elale a kī bite a yavō be kugbulē a.”

IX

I Ade ode foto onyane olode a vō ye kagbulē a. Mmó lisibii lidi kī leka leto ne tite akū, ade bekōa leke dzununuunu a safi bido ne ye awe a.

II Lisibii a binya leke dzununuunu a ade onyo tugbluu nde fi luwotu kpale kame onyo a né eto de kame a. Onyo ne leke dzununuunu a kame fō suwa ane mo odetó kame ke otú.

III Koolo né eto onyo a kame eyako ne tite akū, ade bekpa koolo kōbē a kī kakpōna deī a odu.

IV Bibi be kī betabula tuwī, futse ñye tuwī blɔblɔ tidima kade, mbom bekɛna bati a kī Baguma ɔsūkayi leláa nɛ be nnye a ablɔ.

V Betákpa koolo a osi kī bekɔ bati kīī, mbom kī bekɛna be awɔda tidetɔ elo. Nte beta oti a, fɔawo ndɛ ayekī kakpɔna kata aye.

VI Nɛ tidetɔ elo a na kame ni, bati aawe wuda, lemɛ beláana ye, baawe kī baku lemɛ wuda aalo be.

VII Koolo a la ndɛ baponkɔ kī bemanɛ be bekpa kawũkanɔ. Litsedi teī nɛ be fɔlɔ ndɛ sika ngbã lɔbɔɛ aye, ade be anɛ la ndɛ otidziwa ade aye a.

VIII Be tɔlɔ la ndɛ batsole tide, ade be adɔ la ndɛ dzata ade a.

IX Bekɔa litsedi kī ladã ndɛ babīī katɛ sɔbɔtsaɛ bɛtsa nɛ tɔwɔlɛ. Be fupoki kame kakuna atunɔ ndɛ ayekī baponkɔ mɔ kawũkanɔ tihilili beble-bee wula atɛ banaa kawũ a.

X Bideī tekã mɔ fubīī ndɛ kakpɔna aye, ade be tekã kīī kame kɔbɛ a kī baakɔa bekɛna bati awɔda a deī a.

XI Bideī legã kī lanyã be akũ. Ade ye nye fɔtɔ ɔnyanɛ a kī yadãmena lekɛ dzununuunu a akũ a. Ye dī nɛ Hebri tide kame nye Abadon, ade bave de nɛ Hela tide kame kī Apolion.

XII Lubokamɔ kpale letɔnyade a yatɛ, lemɛ lubo kamɔ nviã buki fɔaya.

XIII Ke liti a, ode fɔtɔ ɔnyanɛ ovũde a vɔ ye kagbulɛɛ a, ade nnu odo odi kī ené eto sika ngbã afɔlibo atenye a kī edzɛ nɛ Baguma anɛ a atɔ ena a kame a.

XIV Odo a bi Baguma ode fɔtɔ ɔnyanɛ ovũde a kī enɛɛ kagbulɛɛ a kī, “Wũnya Baguma ode fɔtɔ

banyane ena a kī bisuli bedzela ne Frat ɔwɔ kpale abui a!”

^{XV} Ade biwūnya Baguma ode foto banyane ena a, kī bemanε biyi badzɔle ɔdoũ a, mɔ luwi a, mɔ odeto a, mɔ kateli a kī beko batidziwa be kasε kame katsu kalalede a.

^{XVI} Bibi yī kī bapɔnko badzine a lidede nye mpim mpim oha nviã.

^{XVII} Ade ayekī mmó bapɔnko mɔ be badzine a ne kanyekatsa kame a ne awī a. Bebla ɔwɔle babī kate fobotsae kī foadã gbãã nde fi katε aye, fubuki foadã nde safir de aye, foyɔɔle lemε nde sulfa de aye. Bapɔnko a folo la nde dzata folo aye, ade fi, ɔnyɔ mɔ fukpokpo geĩgeĩ né futo be tunukpε kame a.

^{XVIII} Bekɔa lubo kamɔ fotsa elale kī fonye fi, ɔnyɔ, mɔ fukpokpo geĩgeĩ kī futo bapɔnko a tunukpε a beko batidziwa kasε kame katsu kalalede.

^{XIX} Kitonekī bapɔnko a kɔbε deĩ ne be tunukpε mɔ tekã kame. Be tekã a la nde boε aye, kī tideĩ folo. Ade te bakɔa kakena bati ablo a.

^{XX} Bati a kī bite bidzi nkpã a flee, kī betáko be ne lubo kamɔ kīĩ kame a, támuniki ne fotsa a kī be mɔawe bekɔa awe beme a kasum liti. Betáfõ hũhũ kpa, baviõ kī bekena mɔ sika ngbã, sika ovoe, kɔoble, de, ãye otse, kī foámɔ, foánu ãye foátsã a kasum!

^{XXI} Betádani tɔwɔle kame ne bati kako, kanɔkɔne kadã, linyolewe mɔ litsolewe, mɔ kaye kame.

X

Ode Foto Jnyane Odi Mɔ Kavolibi a.

I Ke liti a, mmó ode foto ɔnyane mo kobẽ bebã odi kĩ eto ode yaka. Edeĩ ne luflututu kame, ade sinigbene sinya ye loló a. Ye ane ata nde suwa aye, ade ye aboa la nde fi fome fuku aye kĩ fode ne ode a.

II Enne kavolibi kadi kĩ bibinya a ne awe. Ekoa ye somona koboa eke ne mpo akũ ade ekoa seba koboa leme eke ne tite akũ a.

III Eboa fowola kooba nde dzata ame kaklume aye. Kĩ eboa fowola a, oplala evũkono a nye tunukpẽ.

IV Kĩ oplala evũkono a nye tunukpẽ a, nwe kĩ matsela fotsa iyi, leme nnu odo odi kĩ eto ode ele kĩ, “Tale letsa a kĩ oplala evũkono a le a onukpẽ, tatsela foe oyi.”

V Ade ode foto ɔnyane a kĩ mmó kĩ edzẽ ne mpo mo tite akũ a dzela ye somona awe ne ode,

VI elo fubo ne Baguma kĩ edzi nkpã daa a, kĩ ekena tite mo te akũ fotsa, ode mo ye kame fotsa, mpo mo ye kame fotsa a dĩ akũ kĩ, “Liti kakpa leláabuki lena!

VII Leme loko a kĩ ode foto ɔnyane ovũkonde a aavõ ye kagbulee ni, Baguma nhihie kolawa a aaya ne foe kame nde ayekĩ enye etsa ye onukpẽ banyene a kĩ benye basumune a.”

VIII Ke liti a, odo a kĩ nnu ntomena ode a buki ebi yĩ kĩ, “Naate kavolibi a kĩ bibinya a ne ode foto ɔnyane a kĩ edzẽ ne mui mo tite akũ a awe.”

IX Nnaa ode foto ɔnyane a sekẽ mbi ye kĩ ekoa kavolibi a ekpa yĩ. Ebi yĩ kĩ, “Te ke kaba ke. Fóakena mo onye mo onye ne no lupu kame, leme fóana omene ne no onukpẽ kame nde kosã aye.”

X Nte kavolibi a ne ye awe mba ke. Fona omene nde kosã aye ne yĩ onukpẽ kame, leme kĩ mmena foe a, fona onye ne yĩ lupu kame.

XI Ke liti a, ebi yĩ kĩ, “Kene kĩ abuki ode letsã Baguma foletsa a ne bati, temaĩ, tide mo fogã pii akũ.”

XI

Adansifo Nviã a.

I Ke liti a, bekõa otse kĩ ela nde fotsa kakona otse bekpa yĩ, ade bibi yĩ kĩ, “Naakona yĩ Baguma Asoli Kõla a mo afolibõ atenye a, kakã bati a kĩ basum ne Asoli Kõla a kame leme.

II Leme takõna ablanda ne Asoli Kõla akũ a, kitonekĩ bekõa awã bekpa amamufõ. Ade be aasumini Omato Kpalewa a ne tideto tena-nviã kame a.

III Maado yĩ adansifo nviã kĩ bidzi ne tikpekpe tilima kame, beyaade letsã ne Baguma foletsa akũ ne fuwi apim moa mo oha nviã mo aduesia kame.”

IV Adansifo nviã kĩ nyẽ kugua futse nviã mo osedza titse nviã a kĩ tedzẽ ne tite Olate a ane kame a.

V Nte odi we kĩ yakena foe ablo ni, fi ane kato foe tunukpẽ kame kawõla be mo bakesine a. Nte odi we kĩ yakena be ablo ni, baako ye.

VI Bideĩ kobẽ kĩ basua ode osi kĩ oni etako ne loko a kĩ bade letsã ne Baguma foletsa akũ a kame. Bideĩ kobẽ leme kĩ badani mui bekena babõane, ade bideĩ kobẽ kĩ bayamena lubo kamo lidi nyẽ lidi ne tite akũ ne loko nyẽ loko kĩ bawe.

VII Nte bide letsã ne Baguma foletsa a akũ biyua a, oyae kpa a kĩ eto leke dzununuunu kame ene a, aano kawũ mo be. Yaanya be akũ, ekõ be.

VIII Be banokpa aawa ne omato kpale a oblonu akũ ne awã kĩ bebõa be ðlate ne asendua akũ a. Omato a dī kolawa nye Sodom iye Egipte.

IX Bati aato omaĩ nye omaĩ, kade nye kade, tide nye tide mo katinya kame bati flee kame beyaadã banokpa a ne fuwi elale mo seke kame, ade beláakpa osi kĩ bibila be a.

X Tite akũ bati flee aamo kawõle ne bati nviã kĩ wuda akũ. Baanya luwi bemena akũ futelitsa kitonekĩ Baguma onukpẽ banyene nviã kĩ vele lubo kamõ baũ bema batidziwa.

XI Fuwi elale mo seke a liti a, nkpã kaweya to Baguma sekẽ keyawo ne be kame, ade biyidza bedza a. Libe paa wo bati a kĩ bemó be a flee.

XII Adeke Baguma onukpẽ banyene nviã a nu odo mo osĩ odi kĩ eto ode ebi be kĩ, “Mide miya ne awĩ!” Kĩ be bakesĩne a dza bekadã a, bide benaa ode ne luflututu kame.

XIII Ne loko a na kame pɛpɛɛɛ a, tite kuna mo osĩ mo osĩ, omato kpale a ye kasẽ kame katsu kawuade a bubuli bubloo, ade bati mpim evũkonõ ku a. Libe wo bati nkae a, ade bimu ode Baguma a.

XIV Lubokamo mo libe leyade a yatẽ, leme folaledede mo libe a aaya finyaa.

Bevõ Kagbulɛ Kavũkonõde a.

XV Ke liti a, ode foto onyane ovũkonõde a võ ye kagbulɛ a, ade tido kõõba né ne ode tele kĩ, “Katinya kame legãkanyakõ a dani boe ðlate mo ye Kristo a fude, ade yaanya akũ daa daa a!”

XVI Adeke banokoẽ teya-ana a kĩ bidzi ne be fogãkpo akũ ne Baguma ane kame a, ka betsa ane ne tite bisum Baguma,

XVII bele kĩ,

“Boe Olate otumifo,

kĩ edeĩ, kĩ ena ane kokoe.

Boanye no kole kĩ ote no otumi kpale a,

oyi legãkanya a kayo!

XVIII Amamufo na kalokpa,

kitonekĩ loko a wo oto kĩ anye no kalokpa
otsa.

Loko wo oto kĩ adzemo banokpa.

Loko wo oto kĩ ase no basumune onukpẽ banyene
a koto,

mo no bati kpalewa a kĩ bakpa no obu,

mo bati a kĩ bavila no dĩ a,

banokoẽ mo babise.

Loko wo oto,

kĩ awola bati a kĩ babula tite akũ kade a!”

XIX Ke liti a, bibinya Baguma Asoli Kola ne ode a biyi, ade bemó ye apam adakã a ne koe kame a. Deedimope, odeto kame moane, tido né, oplala kpenne, tite kuna ade oni ko mo fodãglegle baũbaũ a.

XII

Otsole a Mo Koe Kpale a.

¹ Ke liti a, nsentseleni kpale adi né ne odeto kame. Otsole odi koa suwa esua akũ nde atadie aye. Odeto deĩ ne ye aboa kayo, ade etsa legãboe kĩ bekoa fusibii ewua-nviã bekena de ne ye lolu a.

II Etsẽmɔ kɔma. Ade kĩ sɛmɛ pi ye sũ a, ɛkatsimtsim akũ mɔ fɔwɔla kɔɔba nɛ foe kawo sũ.

III Nsentsɛleni bɛbã nɛ nɛ odetɔ kame. Dã, fɔnyɛ kɔɛ kpale ngbã, kĩ kudeĩ fɔlɔ evũkɔnɔ, mɔ tɛlɛ ewua, ade kɔtsa fɔgãbɔɛ evũkɔnɔ nɛ fɔlɔ a akũ a.

IV Kɔkɔa koe ɔkã kɔlɔ fusibii kasẽ kame katsu kalalɛde a kutomɛna odetɔ kame kɔta kuwula nɛ tite akũ. Finyaa kɔɛ kpale a yidza kɔdza nɛ ɔmatsɔ a kĩ sɛmɛ pi ye a anɛ kame, kĩ nɛtɛ esila ɛma pɛ kɔabɔɛ obisẽ a kɔmɛna.

V Otsolɛ a má obinyolɛ kĩ yaakɔa sɔbɔtsaɛ otse ɛnya fudɛ fudɛ bati flɛɛ akũ. Lɛmɛ bɛbɔɛ kabisẽẽ a lɛtalɛta bɛnamɛna Baguma mɔ ye lɛgãkpo a sɛkẽ.

VI Otsolɛ a lo ɛnaa kɔsa kame, awã kĩ Baguma manɛ eyi ɛkpa ye kĩ bɛdã ye akũ fuwi apim mɔa, ɔha nviã mɔ aduesia.

VII Kɛ liti a, kawũ nɛ nɛ ode. Mikael mɔ ye ode fɔtɔ banyanɛ nɔ kawũ mɔ kɔɛ kpale a, ade kɔɛ a mɔ koe fɔtɔ banyanɛ a nɔ bɛtsɛlamɔ bɛ a.

VIII Lɛmɛ bɛnya kɔɛ kpale a akũ, ade bɛtãkpa koe mɔ koe basumunɛ a osi kĩ bibuki bidzi nɛ ode a.

IX Bɛta kɔɛ kpale a bimuni nɛ tite akũ. Ade koe nyɛ anɛ kɔkɔɛ kɔɛ a kĩ bave kĩ Abonsam ãyɛ Satana, kĩ kɔkɛ katinya kame bati flɛɛ a. Koe mɔ koe fɔtɔ banyanɛ a flɛɛ bɛta bimuni nɛ tite akũ.

X Kɛ liti a, nnu odo kpaa odi nɛ ode ɛlɛ kĩ, “Finyaakɔ Baguma oti katɛ ya! Baguma nyɛ ye kɔbẽ ɛtsa ndɛ Lɛgã aye! Finyaa ye Kristo a nyɛ ye otumi kanya! Kitonɛkĩ ɛta oti a kĩ ɛdza nɛ

Baguma anε ekatsua boe bawaẽ onukpẽ kakpa Baguma lenye mo suwa a emuni.

^{XI} Ade be letsã Kavelibi a baboane, mo onokoli foletsa a kĩ bidi adansie ne ye akũ a benya ye akũ. Bewe kĩ bakoa be nkpã bekpa faa nte fõanya wuda malo.

^{XII} Ne foesũ ni, kawole kide mi ode, mo mi a kĩ mideĩ ne awã a flee! Lemε tite mo mpo, boboe makpa mi, kitonekĩ Abonsam duma eya ne mi kame mo kalokpa, ade enyina kĩ fuwĩ sukuloo lite ye.”

^{XIII} Kĩ koe kpale a mó kĩ bieta koe bimuni ne tite akũ a, kutomo otsole a kĩ ema obinyole a liti.

^{XIV} Lemε bekpa otsole a okolie kpale fupoki nviã a eyidza enaa awã kĩ Baguma mane eyi ekpa ye ne kosa kame a. Baadãmena ye akũ ne awã futeli elale mo seke, lokoa eweya ne koe kpale a awe kame.

^{XV} Ade koe kpale a vũma mui kĩ bitini nde owõ kutomena koe onukpẽ, bitomo otsole a kĩ bebõe ye benamena.

^{XVI} Lemε tite bumõ otsole a. Tite binya onukpẽ temõa mui a kĩ koe kpale a vũma etomena otsole a flee.

^{XVII} Koe kpale a na kalokpa mo osĩ ne otsole a akũ, ade kodzakũ kĩ kõnaano kawũ mo ye babi mo bawa nkaε a. Ade be nye bati a kĩ bakena ne Baguma mbla a akũ, kĩ bipini onokoli foletsa a kĩ Yesu nye etsa lemε a.

^{XVIII} Ade koe kpale a né kõnadza ne mpo abuĩ a.

XIII

Yohanes Mó Bayae Kpa Nviã.

^I Ke liti a, mmó ɔyae kpa odi kī ene yato mpo kame. Edeĩ fɔlɔ evũkɔnɔ mɔ tele ewua, ade legãbɔe tsane ne ɔle odi nye odi akū a. Betsɛle mbusuo dī kī lasupa Baguma bite ne lolɔ lidi nye lidi akū.

^{II} ɔyae kpa a la nde dzakpa aye. Ye abɔa la nde kalikii abɔa, ade ye onukpẽ lemɛ la nde dzata onukpẽ a. Kɔe kpale a kɔa ye mɔawɛ kɔbẽ, ye legãkpo mɔ ye legãkanya otumi kpale a ekpa ɔyae kpa kīi.

^{III} Fɔdã nde ɔyae kpa a lolɔ mɔa te wuda kaakpa ne de akū, lemɛ kaakpa a ku. Fɔkena katinya kame bati flee wãwã, ade bitomɔ ye a.

^{IV} Bati flee sum kɔe kpale a, kitonɛkī ekɔa ye kɔbẽ ekpa ɔyae kpa a. Bisum ɔyae kpa a lemɛ bele kī, “Owei la nde ɔyae kpa kīi? Owei aapuli enɔ kawū mɔ ye?”

^V Bekpa ɔyae kpa a osi kī ɛɛ kukūpia mɔ fubusuotsa pii enya akū tidetɔ tena-nviã.

^{VI} Eyi kayɔ mɔ Baguma, mɔ ye dī, mɔ awã kī edzi, mɔ bati flee a kī bideĩ ne ode a kadumu.

^{VII} Bekpa ye osi kī enɔ kawū mɔ Baguma bade a enya be akū, ade bekpa ye otumi lemɛ ne fude nye fude, ɔmaĩ nye ɔmaĩ, tide nye tide mɔ tite bati flee akū a.

^{VIII} Tite akū bati flee aasum ye, mbɔente bikī be buĩ betsɛle ne Kavelibi a kī beko a nkpã ovoli kame, kito anɛ kī bebɔa katinya a.

^{IX} Foesū oti a kī edeĩ ato ni, etse!

^X Odi nye odi kī bihihie biyi kī bipi ye ndom ni, baapi ye ndom, ade odi nye odi kī bihihie biyi kī yaato ne kɔpã onukpẽ ni, yaato ne kɔpã onukpẽ

kokooko. Ade fukĩ kame mo kene kĩ Baguma bade a bena owole kado mo katekado a.

XI Ke liti a, mmó oyae kpa bebã kĩ ené eto tite kame. Edeĩ tele nviã nde kavelibi aye, ade yale kodzela nde koe kpale a.

XII Ekena kobẽ kpale a kĩ ete etomena oyae kpa otonyade a sekẽ a akũ adzuma ne ye ane kame. Ehe tite mo te akũ bati flee kĩ bisum oyae kpa otonyade a kĩ ye kaakpa ku a.

XIII Oyae kpa oyade kĩ kena awãwã fotsa pii. Efõ fi malo ne futo ode foyato ne tite akũ ne bati ane.

XIV Eke tite akũ bati flee mo awãwã fotsa a kĩ bekpa ye osi kĩ ekena ne oyae kpa otonyade a ane sũ. Oyae kpa a bi be kĩ beme oyae kpa a kĩ bipila mo kopã a leme ebuki edzi nkpã a kutidu bedzela.

XV Bekpa oyae kpa oyade a osi kĩ eweya nkpã edo ne oyae kpa otonyade kutidu a kĩ beme a kame, ayekĩ yaapuli ele kodzela, efõ beko bati a kĩ baasĩ kĩ beláasum ye a.

XVI Oyae kpa kĩ he bati flee, babisẽ mo banokõẽ, asikafõ mo ahiãfõ, basate mo akũ akũ badzine, kĩ bite sokpõna ne be somona kokpo ãye ne be nnye.

XVII Odima leláapuli eya fotsa ãye eno letsama nte sokpõna kĩ liteĩ ne ye akũ. Sokpõna kĩ nye oyae kpa a dĩ, ãye kakã katsela kĩ fodzẽ fokpa dĩ a.

XVIII Foletsa kĩ akũ kakona sĩ nyansã. Odi nye odi kĩ enyina kadi aapuli ebu oyae a dĩ kakã katsela a akũ akunta, enu foe kayo, kitonekĩ kakã katsela a dza fokpa oti dĩ. Ye kakã katsela a nye oha evũ mo taavũ-evũ (666).

XIV

Kavelibi a Mɔ Ye Bati.

^I Ke liti a, ndã fɔko ade mmó Kavelibi a kī edzẽ ne Zion ɔto a akū a. Bati mpim ɔha tena-ana (144,000) kī betsele Kavelibi a dī mɔ ɔlega a dī bite ne be nnye a dzẽ ne ye sekẽ ne awã.

^{II} Ade nnu odo odi kī ené eto ode kī ela nde ayekī mui ato ɔto akū kaka kako, iye nde ayekī ɔplala kakpenɛ aye. Odo a buki ela nde tɔno kī babɔa ne tesankuo akū.

^{III} Bati mpim ɔha tena-ana a dza bekasã ɔno voẽ ne legãkpo a, mɔ fɔtsa ena a kī fudzi nkpã a, mɔ banɔkɔẽ a anɛ. Otidziwa odima lelápuli ekole ɔno a na, mbɔente bati mpim ɔha tena-ana a kī be odi lolɔ koto bise ne tite akū a.

^{IV} Ade be nye bati a kī bekpale be akū, kī binyína batsole, benye badedzaa. Ade be atomɔ Kavelibi a kanaa kako nye kako kī yanaa a. Ade be leme nye bati a kī bise be lolɔ koto ne batidziwa kasinu a kame, bekena be bati batɔnyade leme bekpa Baguma mɔ Kavelibi a.

^V Betámɔ tã kī bema fɔvã, ade nfumususu adima leme lelãa be akū a.

Ode Fɔto Banyane Elale.

^{VI} Ke liti a, mmó ode fɔto ɔnyane bebã kī yayidza ne tite mɔ ode kayite. Enɛɛ Kale wī a kī kelá kawūna a, kī yaade letsã ne ke akū ekpa tite akū bati, batidziwa aholo aholo, fude nye fude, tide nye tide mɔ omaĩ nye omaĩ.

^{VII} Ebɔa fɔwɔla kɔɔba ele kī, “Mivila Baguma, mikpa ye obu, kitonekī lokɔ wo ɔto kī yadzemo batidziwa. Misum ye a kī ekbɔa tite mɔ ode, mpo mɔ mui kī banɛ ne tite kame a!”

VIII Ode foto ɔnyane ɔyade tomo ɔtonyade a ekale kī, “Eto o-o! Babilonia a kī ete dī a to tsoo! Efo fude fude flee moa ye waī mo ɔsī a kī fonye linyolewe mo litsolewe a!”

IX Ode foto ɔnyane ɔlalede a tomo be nviā a ekaboa fowola kooba kī, “Nte odi sum ɔyae kpa mo ye kutidu a kī beme a, mo ete ye sokpōna ne ye nnye iye kɔkpɔ ni,

X yaamo Baguma kawūnaba waī a kī ekɔa eko ne ye kalokpa koopu kame a. Bati flee a kī bekena fukī odu a, Baguma aamona be lubo ne fi mo fukpokpo geīgeī kame ne ode foto banyane kpalewa a mo Kavelibi a ane kame.

XI Be lubo kamo fi ɔnyo a aakade ne ode daa daa. Bati a kī basum ɔyae kpa a mo ye kutidu a kī beme a, mo bikī ye dī sokpōna a teī ne be akū a, lelāana kaweya lenye mo suwa da.”

XII Ade awī mo Baguma bade a kī bakena ne ye mbla a akū, bete Yesu bido leme a, sī ɔwole kado a.

XIII Ke liti a, nnu odo odi kī eto ode ekale kī, “Tsele kayi kī, Kito finyaa kanaa ni, Baguma hila bati a kī biku ne Kristo katekado kame a!” Hūhū a te etuno kī, “Nuwī, Baguma hila be! Baaweya bitomena be lubo kamo kame, kitonekī be tudzuma kakena tomo be!”

Tite Akū Bati Kakpota.

XIV Ke liti a, ndā fokɔ ade mmó luflututu fitaa lidi, kī litsedi nde otidziwa aye dzi ne de akū. Etsa sika ngbā lobɔe, enee lesega mo ɔbō ne awe.

XV Ade Baguma ode foto ɔnyane bebā né eto Asoli Kola a kame, eboa fowola kooba ebi oti a kī edzi ne luflututu akū a kī, “Kɔa no lesega a

kanena fudutsa, kitonekĩ loko wo oto, tite akũ fudutsa bo fokpa kakpota!”

XVI Ade ke oti a kĩ edzi ne luflututu akũ a wũnya ye lesēga ne tite akũ ekpota fudutsa a flee a.

XVII Ke liti a, mmó ode foto onyane bebã odi kĩ ené eto ode Asoli Kola a kame. Ye malo enee lesēga mo obõ lidi.

XVIII Ade ode foto onyane bebã odi kĩ edeĩ otumi ne fi akũ a né eto afolibo atenye a kame a. Eboa fowola koba ebi ode foto onyane a kĩ enee lesēga mo obõ a kĩ, “Koa no lesēga a kakpale waĩ babi a ne tite akũ kobã a kame, kitonekĩ waĩ babi a yole!”

XIX Foesũ ode foto onyane a wũnya ye lesēga a ne tite akũ ade ena waĩ babi a ne towẽ akũ a. Eta be eko ne waĩ kakã leke kpale, kĩ lenye Baguma kalokpa a kame.

XX Binuna waĩ babi a mo foneta ne omato a obaẽ, ade baboane tini bito waĩ kakã leke a kame a, betẽ nde owo a. Baboane a kadzũ kame aana nde foneta elo iye oponko akũ kadzela, ade bitini benaa nde fusikũ oha nviã a.

XV

Ode Foto Banyane Koa Lubokamo Nkae a Beyamena.

I Ke liti a, mmó awãwã fotsa kpale bebã kĩ fanyene akũ paa ne odetó kame. Ade foe nye ode foto banyane evũkonõ kĩ benee lubokamo evũkonõ a. Lubokamo kĩ nye nkae flee a kĩ foe aanye Baguma kalokpa nkae a fotsa.

II Ade mmó litsedi nde mpo kĩ ladã nde ahuhoe kĩ fi tseka mo ye. Mmó bati a kĩ benya oyae kpa,

mɔ ye kutidu a kī bɛmɛ́, mɔ ye kakã katsɛlɛ dī
akū a, kī bɛdzẽ nɛ ahuhɔɛ mpo a abuĩ, bɛnɛɛ
tesankuo kī Baguma kpa be. ^{III} Bɛkasã Baguma
ɔsumunɛ Mose mɔ Kavelibi a ɔnɔ kī,

“O boe ɔlate Baguma Kpale,
nɔ tudzuma pɔnɛ,
ade takɛna wãwã a!

Nɔ fude fude flee Lɛgã,
Nɔ tisi adã kpĩ,
ade tenyɛ ɔnɔkɔali a!

^{IV} O boe ɔlate, owei koũ lɛlãavila nɔ?
Owei aasĩ kī ɛlãado nɔ dī obu?

Kitonɛkī nɔ odi nyɛ oti kpalɛwa,
fude fude flee a aayasum nɔ,

kitonɛkī bɛnyɛ nɔ fɔtsa kakɛna kpĩ a bɛtsa bati
flee.”

^V Ke liti a, ndã fɔkɔ ade mmó kī bibinya Asoli
Kɔla nɛ ode a kī Lɛpɛ Kpalɛwa a deĩ nɛ koe kame
a biyi.

^{VI} Ode fɔto banyanɛ evũkɔnɔ a kī bɛnɛɛ lubo
kamɔ evũkɔnɔ a nɛ bito Asoli Kɔla a kame. Bido
aklala fitaa kī yata muamua tɛtadiɛ, ade bɛkɔa
sika ngbã abɔsɔ bɛbɔa nɛ towɔlɛ a.

^{VII} Ade fɔtsa ɛna a kī fudzi nkpã a kame
fɔmɔa kɔa sika ngbã tɔkɔɔpu evũkɔnɔ kī tiyi
tsɔnɔnɔnɔnɔ mɔ Baguma kī edzi nkpã daa a
kalɔkpa, ɛkpa ode fɔto banyanɛ evũkɔnɔ a.

^{VIII} Ade ɔnyɔ a kī eto Baguma kukũkpale mɔ ye
kɔbẽ kame a yi Asoli Kɔla a flee kame a. Odima
tãpuli ewo nɛ Asoli Kɔla a kame kenawo kī lubo
kamɔ evũkɔnɔ a kī ode fɔto banyanɛ evũkɔnɔ a
yamɛna a onukpẽ tsua.

XVI

Bitsokui Baguma Kalokpa Ne Tokooru Kame a Biko Ne Tite Akū.

^I Ade nnu odo koōba odi kī ené eto Asoli Kola a kame ekabi ode foto banyane evũkoōo a kī, “Minaatsokui Baguma kalokpa ne tokooru kame a miko ne tite akū!”

^{II} Adeke Baguma ode foto onyane otonyade a natsokui ye kooru kame fotsa a eko ne tite akū a. Bati a kī bite be oyae kpa sokpõna a, mo be a kī bisum ye kutidu mewa a né fookpa kī fawo, kī foakū leme ne akū.

^{III} Ade ode foto onyane oyade a naa enatsokui ye kooru kame fotsa a eko ne mpo kame a. Mui a dani nde onokpa baboane aye, ade letsa nye letsa kī lidzi nkpā ne mpo kame a ku a.

^{IV} Ke liti a, ode foto onyane olaledede a leme tsokui ye kooru kame fotsa a eko ne towo mo mui kanekõ kame, ade mui a dani baboane a.

^V Nnu kī ode foto onyane a kī yadāmena mui akū a le kī,

“O Oti Kpalewa, no kī odeĩ daa, kī ona ane koōe a,
ako oto ne osi kpĩ akū!

^{VI} Bati kī ko Baguma bade a mo ye onukpẽ banyene baboane ne tite,
ne foesũ okpa be baboane kī bemoa.
Nuwĩ, soto kavele kī feta be!”

^{VII} Ade nnu odo odi kī ené eto afolibõ atenyee a kame kī, “O boe Olate Baguma, no otumifo adi onokooli, ade ako koto ne osi kpĩ akū a.”

VIII Ode foto onyane onade a tsokui ye koo pu kame fotsa a eko ne suwa akũ, ade bekpa se osi kĩ sipila bati mo se fi a.

IX Fi a otutuo mo osĩ a pila bati ade bele fubusuotsa ne Baguma a kĩ ye deĩ otumi ne lubo kamo kĩ akũ a, leme bisĩ kĩ baádani towole kame bimu ye.

X Ke liti a, ode foto onyane olode a tsokui ye koo pu kame fotsa a eko ne oyae kpa a legãkpo akũ. Adeke otũ ke ne oyae kpa a legãkanyakõ a, ade bati dõ fome ne ayekĩ fawo be a sũ.

XI Ne foesũ bele fubusuotsa ne Baguma kĩ edeĩ ne ode a akũ. Tito kĩ fookpa a kĩ bené a awo be malo ni, bisĩ kĩ baádani towole kame ne be fotsa kpa kakena kame.

XII Ade ode foto onyane ovũde a tsokui ye koo pu kame fotsa a eko ne Frat owõ kpale a kame a. Owõ a viõ ade enye osi ekpa fogã a kĩ futo suwa kadekõ a.

XIII Ke liti a, mmó hũhũ fĩ elale kĩ bela nde fopotrolõ, bene bito koe kpale a onukpẽ, mo oyae kpa a onukpẽ mo fovã onukpẽ onyene a onukpẽ kame.

XIV Be nye hũhũ kpa a hũhũ kĩ yakena awãwã fotsa a. Hũhũ elale kĩ ane kanaa katinya kame fogã flee sekẽ, kakpota be kakpa kawũkano ne Baguma Otumifo Flee Luwi kpale a akũ.

XV “Mitse! Maya nde oyekpane aye! Baguma hila oti a kĩ esi lipe yadãmena ye tetadie akũ, ayekĩ eláatsã odzo, konyoã liwo ye ne kanade!”

XVI Ade hũhũ kpa a kpota fogã a ne awã kĩ bave ne Hebri tide kame kĩ Armagedon a.

XVII Ke liti a, ode foto onyane ovũkõnde a natsokui ye kooƿu kame fotsa a eko ne ɔwe kame. Ade odo kooƿa odi né eto legãkpo a ne Asoli Kõla a kame kī, “Fuwoli!”

XVIII Ade odetó kame kamõane, tido mo ɔsĩ kane, ɔplala kakpene kooƿa, ade tite leme kuna mo ɔsĩ mo ɔsĩ a. Kito ane kī otidziwa ne katinya ni, tite tákuna mo libe lomõ tõ. Ade fukĩ nye tite kakuna kī kiwo libe keƿa flee a!

XIX Ɔmato kpale a bẽ ne fõke elale kame, ade fude flee temato tekpale tekpale bubuli a. Baguma te ane ne Babilonia kī ete dī a akũ, ade efõ emõa ye kalokpa waĩ mo ɔsĩ a ne ye kooƿu a kame a.

XX Tite a kī mui sinya te a flee yela, ade toto flee leme buki teláa kī bamõ a.

XXI Fodãglegle baũ baũ kī lidi nye lidi ɔlõme aana nde kilo taalo to ode foyawula ne bati akũ. Ade bele fubusuotsa ne Baguma akũ ne foe kawo a sũ a.

XVII

Ɔdõpaani a Kī Ete Dī a Soto Kavele.

I Ke liti a, ode foto banyane a kī bele tókooƿu evũkõnõ a kame omõa ya ne yĩ sekẽ ebi yĩ kī, “Ya, ntsa no ayekĩ bevele adõpaani a kī ete dī, kī edzi ne towõ pii akũ a soto.

II Tite akũ fõgã boa adõpaa mo ye, ade ye adõpaa kabõa waĩ a wugela tite akũ bati a.”

III Ode foto onyane a kpã yĩ ne hũhũ kame enamena kosa kame. Ne awã mmó otsole odi kī edzi ne ɔyae kpa ngbã odi akũ. Betsele mbusuo

buĩ kĩ basupa Baguma bite ne oyae a akũ flee, ade edeĩ fɔlo evũkɔnɔ mɔ tele ewua a.

IV Otsole a do atadie ngbã mɔ fɔwɔwa ntsekantseka, ade ehehe akũ mɔ sika ngbã fɔtsa, boe mɔ kɔya, mɔ fulitsa mɔ kɔya a. Enne sika ngbã kɔɔpu kĩ eyi mɔ efĩ mɔ kowẽ fɔtsa a kĩ ena etomena ye adɔpaa kabɔa kame a ne awe.

V Betsele dĩ kĩ de kayɔkanye bela bite ne ye nnye kĩ,

Babilonia kĩ ete dĩ,
Adɔpaafo mɔ tite akũ fubusuotsa flee ɔma.

VI Otsole a kĩ mmó a wuga Baguma bade a, mɔ bikĩ bidi adansie ne Yesu katekado akũ sũ a babɔane.

Kĩ mmó ye a, fɔkena yĩ wãwã paa.

VII Ade ode fɔto ɔnyane a via yĩ kĩ, “Nde sũ fɔkena nɔ wãwã? Maabi nɔ kale ne otsole a, mɔ oyae a kĩ edeĩ fɔlo evũkɔnɔ mɔ tele ewua, kĩ ye akũ edzi a fɔletsa kolawa.

VIII Oyae kpa a kĩ ɔmó a dzi nkpã tɔ leme finyaa eku. Yaane eto leke dzununuunu a kame eyaatẽ enaa bewɔla ye. Fɔakena bati a kĩ bidzi nkpã ne tite akũ, kĩ betátsɛle be buĩ bido ne nkpã ovoli a kame, kito ane kĩ bebɔa katinya a wãwã nte bemó oyae a, kitonekĩ enye oti kĩ edzi nkpã tɔ, finyaa eláa, leme yaabuki eya.

IX “Fukĩ sĩ fɔkpa nyansã mɔ fɔtsa kayɔkanu mɔ nyansã. Fɔlo evũkɔnɔ a nye kɔtɔbii evũkɔnɔ, awã kĩ otsole a adzi a.

X Fubuki fɔnye fɔgã evũkɔnɔ, kĩ foe elo tɔ kɔkɔe, lomɔa anya akũ finyaa, ade de nkae a táya tɔ. Nte leya ni, kene kĩ lenya akũ loko lukũ odi.

XI Ɔyae kpa a kī edzi tō, leme ebuki eláa a nye legã lelēde, kī lenye fogã evũkɔno a kame ɔmoa kī laanaa bewola de.

XII “Tele ewua a kī ɔmó a nye fogã ewua kī betádo tō fogã kanya awe, leme bekpa be kóbě kī baanya fogã doũhuile moa mo ɔyae kpa a.

XIII Fogã ewua kī flee deĩ botae moape, ade baakoa be kóbě mo otumi bekpa ɔyae kpa a.

XIV Baano kawũ mo Kavelibi a, leme Kavelibi a aanya be akũ, kitonekī ye nye balate flee Ɔlate, fogã flee Legã. Bemɔ ye bade a kī eve, epau, mo bikī bitomɔ ye ne ɔnokɔali kame a, aanya akũ mo ye.”

XV Ode foto ɔnyane a buki ebi yī kī, “Mui a kī ɔmó kī ɔɔpaani a dzi ne be akũ a nye ɔmaĩ nye ɔmaĩ, fude nye fude, batidziwa flee mo tide aholo aholo.

XVI Tele ewua a kī ɔmó a mo ɔyae kpa a aakesĩ ɔɔpaani a. Baate letsa nye letsa ne ye awe befō edzi ɔdzo. Baaba ye sekena bido ye fi evio.

XVII Kitonekī Baguma lekɔa foe edo ne be towole kame kī bekena ne nhiehie a kī ekena eyi a akũ, fofō bekena ɔmoa bekɔa be kóbě bekpa ɔyae kpa a enya akũ, kenaawo loko a kī Baguma foletsa a ya ne foe kame.

XVIII “Otole a kī ɔmó a nye ɔmato kpale a kī yanya tite akũ fogã akũ a.”

XVIII

Bibubuli Babilonia Ɔmato a.

¹ Ke liti a, mmó ode foto ɔnyane bebã kī eduma eto ode yaka. Edeĩ kóbě paa, ade ye akũ ohaĩ kpale tite flee akũ a.

- II Ebõa f̃owola k̃ooba ẽle k̃i,
 “Eto o-o! Babilonia omato a k̃i ete d̃i a to tsoo!
 Ẽdani h̃uh̃u k̃pa mõ h̃uh̃u k̃i efĩi dẽi ne ye
 ak̃u,
 mõ efĩi k̃oṽolabi, mõ k̃oṽolabi k̃i bakes̃i a
 kadzik̃õ.
- III Kitonek̃i fude flee mõa ye ad̃opaa ak̃u kalok̃pa
 bave a.
 Tite ak̃u f̃og̃a bõa ad̃opaa mõ ye,
 ade katinya kamẽ f̃oyaato banyanẽ ts̃a ye
 anengb̃a kana kamẽ bedani asikaf̃o a.”
- IV Ade nnu odo beb̃a k̃i eto ode ẽle k̃i,
 “Yĩ bati, miné ne ye kamẽ!
 Ket̃anẽ k̃i miakena tok̃pa a na odu,
 ade ket̃anẽ k̃i miana ye soto kaṽele a na odu
 a.
- V Kitonek̃i bet̃et̃et̃e ye tok̃pa tide tenatamõ ode,
 ade Baguma te anẽ ne ye tok̃pa ak̃u a.
- VI Mik̃ena ye ndẽ ayek̃i ye malõ ek̃ena mi a.
 Mise ye foe titi nvĩa ne fuk̃i ek̃ena a onukp̃ẽ.
 Miyula bave mõ os̃i tek̃õpu nvĩa mik̃pa ye,
 ne am̃oa a k̃i ek̃pa mi a onukp̃ẽ!
- VII Mim̃ona ye lubo,
 ebe k̃onya ayek̃i kefeta
 fuketimõ ayek̃i edzi ne ak̃u kah̃eh̃e mõ nkp̃a
 kanya kamẽ a.
- Kitonek̃i yabi ye ak̃u daa k̃i,
 ‘Ndzi ne awĩ ndẽ leg̃atsole aye!
 Nnẽ okunawa mañe,
 ade nlãabe ayol̃oh̃o da a!’
- VIII Ne fuk̃i s̃u ni, ne luwi mõapẽ kamẽ,
 lubo kam̃o k̃i f̃onyẽ,
 wuda, f̃oso, k̃onya kabe mõ kolẽ aaya ne ye
 ak̃u.

Baapila ye mɔ fi evio gbunugbunugbunu,
kitonekĩ boe ɔlate Baguma a kɪ ɛko ye kɔɔto
a nye ɔbelebe.

IX “Nte tite akũ fɔgã a kɪ beboɔ adɔpaa mɔ
ɔmato a, benya nkpã mɔ ye a, mɔ fi a kɪ fɔapila
ye ɔnyɔ a yade ni, baabɔɔ fɔwɔla bibe ye.

X Baadza mɔ lugo ne ye lubo kamɔ kavila a sũ
bele kɪ,

‘Ao! Ao! Nɔ, ɔmato kɪ ete dɪ!

Nɔ, Babilonia kɪ odeĩ kobẽ!

Dɔũhuile mɔape kame beko nɔ kɔto!’

XI “Tite akũ fɔyaato banyane a lemɛ aabe biwo
ɔblo mɔ ye, kitonekĩ odima buki yaáya be fɔtsa.

XII Kɔyaato fɔtsa a nye sika ngbã, sika ovoe, boe
mɔ kɔya, fulitsa mɔ kɔya, aklala, tilima ngbã,
tilima ɔɔwa, tilima plɔplɔ, titse kɪ tabɔɔ mɔ olẽ,
kunu adɔ fɔtsa, mɔ titse mɔ kɔya, kɔoble mɔ
sobɔtsae ɔɔwa fɔtsa, mɔ kɔla kake boe kɪ betɛ
kɔya.

XIII Fɔbebã nye futse fɔkpã mɔ olẽ kɪ bave
sinamon mɔ kutu olẽ kado fɔtsa, lifii mɔ klubɔũ,
bave mɔ kugua kɪ bakɔɔ kato, onuvɔe kpɛtɛɛ
mɔ fɔwã, kugua kɪ batsɛla, banantsue mɔ baveli,
bapɔnkɔ mɔ tihilili, basate mɔ batidziwa kɪ baya
kɔkɔ malo.

XIV “Fɔyaato banyane a aale kɪ, ‘Futse babi a
kɪ fɔakɔ nɔ odo a aalo fɔfɔne nɔ. Nɔ akũ kana
fɔtsa flee mɔ nɔ akũ kahɛɛ a yɛla ne nɔ akũ,
ɔláabuki ɔmɔ foe da!’

XV Fɔyaato banyane a kɪ benya kɔyaato fɔtsa
kumekume kame mɔ ɔmato a bedani asikafɔ a,
aadza mɔ lugo, ne lubo kamɔ kavila sũ. Bibe,
biwo ɔblo,

XVI bele kī, 'Ao! Ao! Ɔmato kī ete dī!
 Ɔmato kī behehe ye mo aklala fitaa, tilima
 ngbā, tilima ɔwa,
 sika ngbā fotsa, boe kī bete koya mo fulitsa
 mo koya!

XVII Dɔũhuile moape kame ye akū kana fotsa a
 flee bu kade pasaa.'

"Ɔkolo a kame banokɔẽ flee, mo ɔwo akū
 basitsāne, ɔkolo batane a mo bati bebā a kī batsā
 mpo akū kanya koyaato a dza mo lugo,

XVIII bebɔa fowola kɔɔba ne loko a kī bemó
 ɔmato a kī elamena kavio a ɔnyo a kī, 'Ɔmato
 kpale kīi odu né katinya tɔ?'

XIX Bifila kudu biko ne be folo kame ade bibe
 mo konya bele kī,

'Bobɔe bobɔe boakpa ɔmato kpale kīi!

Ɔmato kpale kī ye kame futima balate
 na akū bitomena ye akū kana fotsa kame
 bedani asikafɔ.

Kitonekī ne dɔũhuile moape kame bekena ye
 bubloo!

XX O ode, mo mi Baguma bade a, mo mi foto
 banyane mo Baguma onukpẽ banyene a,
 mimo kawole!

Kitonekī Baguma ko ye koto ekpa mi ne letsa a
 kī ekena mi a sū!' "

XXI Ke liti a, ode foto ɔnyane mo kobẽ odi boe
 de kī lɔpɔne lububu nde kowole ade eta edo ne
 mpo kame, ele kī,

"Ade aye baabɔe Babilonia ɔmato kpale a bibo
 mo fokɔ,
 ade beláabuki bemó ye da a.

XXII Beláabuki binu towẽ tesankuo, tifluti mo
 kugbulee tido

ne no kame da.
 Beláabuki bemó awe adzuma okenane odima
 leme
 ne no kame da,
 ade ayea leme beláabuki binu fotsa kawole
 ne kowole akū nkā da ne no kame a!
 XXIII Beláabuki bemó osedza katē
 ne no kame da,
 ade beláabuki binu olitsō mō obolitsō nyo tido
 ne no kame da a.
 No koyaato banyane a
 nye katinya kame banokoē banokoē,
 ade okoa no kanokone kadā oke katinya kame
 bati flee a.
 XXIV Bevele Babilonia soto, kitonekī ye kame
 bemó Baguma onukpē banyene mō
 Baguma bade a baboane.
 Nné be odi bade bemó, mbom mō bati a kī
 beko ne tite akū a
 baboane bémō ne ye kame.”

XIX

I Fukī liti a, nnu litsedi nde bati kodabu baū
 odo ne ode, ekale kī,
 “Mimu Baguma!
 Nkpā kate, kukūkpale mō kobē nye boe Baguma
 fude!
 II Yadze foletsā ne onokoali kame, ade yako
 koto ne osi kpī akū a.
 Eko odopaani kpale a kī ekoa ye adopaa ebula
 katinya kame kade a koto.
 Baguma vele ye soto kitonekī ekó ye basumune
 a.”
 III Bibuki bebōa fowola kī,
 “Mimu Baguma!

Ɔnyo a kī yane ne ɔmato a kame a ade ne ode daa.”

IV Banokɔ̃ tɛya-ana, mo fɔtsa ɛna a kī fudzi nkpā a ka bɛtsa ne tite bisum oti a kī edzi ne legākpo akū, ade bɛɛ kī,
“Fɔya lomɔ! Mimu Baguma!”

Kavelibi a Obolitsɔ Kapi Luwi Kanya.

V Ade odo odi né eto legākpo a kame kī,
“Mimu boe Baguma,
mi flee a kī mi ye basumune mo ye bati flee,
banokɔ̃ mo babisɛ a kī miavila ye a.”

VI Ke liti a, nnu odo odi nde bati kodabu baū fowɔla kabɔa iye nde ato ɔto akū mui kaka kako ne lutubu kame, iye ɔplala kakpenɛ mo ɔsī aye. Odo a le kī,
“Mimu Baguma!

Kitonekī boe Ɔlate Baguma Kpale anya Legā!

VII Mifɔ bɔmo kawɔɛ, butu osee budo ye obu.
Kitonekī Kavelibi a obolitsɔ kapi luwi a wo ɔto,
ade ye obolitsɔ a mane akū ekpa foe a.

VIII Bekɔa aklala fitaa, kī yata muamua lima bekpa ye kī edzi.”

Aklala fitaa kpalewa a nye fɔtsa wī a kī Baguma bade a kena.

IX Ade ode foto ɔnyane a bi yī kī, “Tsele kayi kī bihila bati a kī beve kī beya ne Kavelibi a obolitsɔ kanyakɔ̃.” Ebuki ɛɛ kī, “Baguma onukpɛ kame foletsɛ pɛpɛpɛ nye fukī.”

X Ade nto ne ye abɔa kame kī masum ye a, leme ebi yī kī, “Takena foe! Bɔmo no mo awaɛ ame a kī bidi adansie ne Kristo akū a kame ɔmoa mane. Ke aduli kakpa Baguma odi!”

Kitonēkī adansie a kī Kristo di a ado Baguma onukpē banyene kobē.

Ɔponko Ovoe Akū Odzine a.

XI Ke liti a, mmó kī ode binya ewaa, ade mmó Ɔponko ovoe odi kī edzē a. Oti a kī edzi ne Ɔponko a akū a dī nye Oti Kpīī mō Ɔnokwalini. Yadze foletsa kano kawū ne osi kpīī akū.

XII Ye banebi la nde fi seme aye, ade fogābɔe beblebee tsane ne ye lolɔ a. Betselē dī lidi bite ne ye akū, kī odima linyina de kayɔ, mbɔente ye odi.

XIII Edo atadie kī bisi bido ne babɔane kame. Ye dī nye Baguma Kale a.

XIV Ode sodzafɔ kodabu kodabu do aklala ovoe fitaa tetadie, bidzi ne bapɔnko ovoe akū bitomɔ ye.

XV Lepame mō ɔbɔ né lito ye onukpē kame, kī yaakɔa ewola fude akū. Yaakɔa sobɔtsae otse enya be akū, ade yaasumini Baguma Kpale kalokpa mō osī a enye ye waī kanunakɔ a.

XVI Dī a kī betselē ne ye atadie wulaa mō lutolo akū a nye

Fogā Flee Legā mō Balate Flee Ɔlate.

XVII Ke liti a, mmó ode foto onyane odi kī edzē ne suwa akū. Eɔa fowola kɔɔba ebi kɔvɔlabi a kī kɔayidza ne ɔwe kame a kī, “Miyaaatsena minya Baguma olobe funitsā kpale a.

XVIII Miyaaatsuli fogā, sodzafɔ banɔkɔē, sodzafɔ, bapɔnko mō bapɔnko badzine sekena, akū akū badzine, banɔkɔē mō babisē flee sekena!”

XIX Adeke mmó kī ɔyae kpa a, mō tite akū fogā a kpɔta be sodzafɔ kodabu a kī bano kawū mō

oti a kī edzi ne ɔpɔnkɔ akū a mɔ ye sodzafɔ flee a.

XX Bipi ɔyae kpa a, mɔ fɔvā onukpɛ ɔnyene a kī ekena awāwā fɔtsa ne ye ane a. Ade awāwā fɔtsa kī ekɔa eke bati a kī bete ɔyae kpa a sɔkpɔna mɔ bikī bisum ye kutidu kame a. Beta ɔyae kpa a mɔ fɔvā onukpɛ ɔnyene a ɔgɔ bido ne fi lutubu kī latɛ gɛigeĩ a kame.

XI Bekɔa oti a kī edzi ne ɔpɔnkɔ akū a lepame a kī lenɛ lito ye onukpɛ kame a beko bati nkae, ade kɔvɔlabi flee yatsuli be sekɛna ayekī kɔapuli a.

XX

Bido Okesĩne a Ne Kɔla Futeli Apim Mɔa.

I Ke liti a, mmó ode fɔtɔ ɔnyane odi kī eto ode yaka, kī eneɛ leke dzununuunu a safi mɔ nkɔsɔnkɔsɔ kpale adi ne awe.

II Epi kɔe kpale a, kī kɔna kɔkɔkɔe a, kī have Abonsam ãye Satana a, esuli koe eyi ekpa futeli apim mɔa.

III Ode fɔtɔ ɔnyane kɔa ye edo ne leke dzununuunu a kame ebale de onukpɛ, etale de lemɛ ayekī eláapuli ebuki eke fude fude bati kɛnaawo kī futeli apim mɔa a yatɛ. Lemɛ ne foe liti a, kene kī befɔne ye awe sukuloo.

IV Ke liti a, mmó fɔgãkpo fudi, ade bati a kī bidzi ne foe akū a, bekpa be kɔbɛ kī bedze fɔletsɔ. Mbuki mmó bati a kī bikpeli be fɔlɔ, ne ayekī bidi adansie ne Yesu ɔnokɔali, mɔ Baguma kale a akū sū a tekla. Ade be letásum ɔyae kpa ãye ye kutidu a kī beme a, ãye bete ye sɔkpɔna ne be nnye ãye

ne awe a. Biyidza bibuki bidzi nkpã benya legã mo Kristo futeli apim moa.

V Ade fukĩ nye banokpa kayidza kadzi nkpã atonyade a. Banokpa nkaε a kō táyidza bidzi nkpã kenawo kĩ futeli apim moa a aatē.

VI Baguma hila bati a kĩ bena tsefã ne banokpa kayidza katonyade kĩ kame a, kĩ ekpale be akũ lemε a. Wuda ayade a lelã kobē ne be akũ, baanya Baguma mo Kristo basofɔ, ade baanya fogã mo ye futeli apim moa a.

Benya Satana Akũ.

VII Nte futeli apim moa wũna a, baanye Satana ne kola,

VIII ade yanaa εnaake fude fude kĩ fudeĩ ne katinya tukontoũ εna a kame kĩ fonye Gog mo Magog, ekpota be ekpa kawũkanɔ. Be lidede aana nde mpo abuĩ dã.

IX Betsã tite dzelewa a akũ benadza bisinya Baguma bade a kadzikõ mo ye omato kpale a kĩ yawε kale a. Lemε fi to ode foyawola be flee.

X Ade beta Abonsam a kĩ eke be a bido ne fi lutubu mo fukpokpo geĩgeĩ a kame, ne awã kĩ benya loto beta oyae kpa mo fovã onukpẽ onyene a bido a. Baamonã be lubo lenye mo suwa daa daa.

Katinya Kame Kadzεmena Nkaε.

XI Ke liti a, mmó legãkpo kpale ovoe lidi mo oti a kĩ edzi ne de akũ a. Tite mo ode lo ne ye anε kame, ade betãna kakoma bekpa te a.

XII Ade mmó banokpa, banokõε mo babisē kĩ bedzē ne legãkpo a anε a. Bibinya tuvoli biyi, ade bibinya ovoli bebã odi lemε kĩ enye nkpã ovoli a.

Bedzemɔ banɔkpa nɛ be fɔkelatsa onukpɛ̃ ndɛ ayekĩ betsele biyi nɛ tuvoli a kame a.

XIII Mpo nye banɔkpa a kĩ bideĩ nɛ ye kame a ekpa, ade wuda mɔ kanɔkpade lemɛ nye banɔkpa a kĩ benɛɛ a bekpa a. Ade bedzemɔ be kame odi nye odi nɛ ye fɔkelatsa onukpɛ̃ a.

XIV Ke liti a, beta wuda mɔ kanɔkpade biwula nɛ fi lutubu baũ a kame. Fi lutubu baũ kĩi nye wuda ayade a.

XV Ade odi nye odi kĩ betámɔ ye dĩ nɛ nkpã ovoli a kame ni, beta ye bido nɛ fi lutubu baũ a kame.

XXI

Tite Mɔ Ode Vɔɛ̃.

I Ke liti a, mmó tite vɔɛ̃ mɔ ode vɔɛ̃, kitonekĩ tite tetɔnyade a mɔ ode ɔtɔnyade a yetɛ̃, ade mpo lemɛ buki eláa a.

II Ade mmó Ɔmato Kpalɛwa, Yerusalem vɔɛ̃ a, kĩ eto ode nɛ Baguma sekɛ̃ yaka. Behɛɛ nɛ ndɛ obolitsɔ̃ kĩ bemanɛ bekpa ɔnyɔ aye.

III Ade nnu odo kɔɔba kĩ enɛ eto legãkpo a kame elɛ kĩ, “Finyaa kɔ̃ Baguma kadzikɔ̃ deĩ nɛ batidziwa kayite! Yaadzi nɛ be sekɛ̃, ade baanya ye bati a. Baguma mɔawɛ aadzi nɛ be kame, ade yaanya be Baguma a.

IV Yaayɔ enye babe nɛ be anɛ kame. Wuda leláabuki ena. Ade ayea ayolohɔ, kabe mɔ kalɔɛ leláabuki fɔna a, kitonekĩ kɔkɔɛ fɔtsa a yatɛ̃.”

V Ade oti a kĩ edzi nɛ legãkpo akũ a lɛ kĩ, “Dã, finyaa nkɛna fɔtsa flee fɔvɔɛ̃!” Ebi yĩ lemɛ kĩ, “Tsele fukĩ kayi, kitonekĩ fɔletsã kĩi nye ɔnɔkɔali kĩ baapuli betɛ foe bido.”

VI Ade eɛ kī, “Biyua, letsa nye letsa! Yī nye ɔtonyade mo owūnade, kayokayi a mo kawūna a. Odi nye odi kī ɔmoado ako ye ni, maakpa ye osi emoa mui etomena nkpā lowoke kame faa.

VII Odi nye odi kī enya akū ni, yaana fukī etomena yī sekē. Maanya ye Baguma ade ye malo yaanya yī obi a.

VIII Leme babelibe, bati aboa banyene, kowē fotsa bakenane, awudifo, adopaafɔ, kanokone badāne, baviñ basumene mo bavālevā flee a, aana be tsefā ne fi lutubu baū a kī latē mo fukpokpo geigei a kame. Ade fukī nyé wuda ayade a.”

Yerusalem Vɔē a.

IX Ke liti a, ode foto banyane evūkono a kī benee tokooɔpu evūkono a kī tiyi mo lubo kamo evūkono nkae a, kame moa ya ne yī sekē, ade ebi yī kī, “Ya, ntsa no Obolitsō a kī enye Kavelibi a ɔtsō a.”

X Hūhū a wo ne yī kame, ade ode foto onyane a boe yī enamena ɔto gei odi kalete a. Etsa yī Yerusalem, ɔmato Kpalewa a, kī eka eto ode ne Baguma sekē yaya a,

XI ade ekata mo Baguma kukūkpale a. ɔmato a kata la nde de kī lidei koya, fola leme nde yaspa de kī de kame kpale nde ahuhoe aye.

XII Bike seebi kpale gelelele bisinya ye ade benye tunyukpē ewua-nviā kī ode foto banyane ewua-nviā dzi ne te tunyukpē a. BetsELE Israel futete ewua-nviā a bui bite ne tunyukpē a akū.

XIII Tunyukpē elale dei ne seke sidi nye sidi akū, te elale dei ne suwa kadekō, te elale dei ne kayo,

te elale deĩ ne nyange, ade te elale deĩ ne suwa katomukõ a.

XIV Bike omato a seebi a ne kayokayi futekũ boe ewua-nviã akũ, ade Kavelibi a foto banyane ewua-nviã a buĩ teĩ ne be akũ a.

XV Ode foto onyane a kĩ bomo ye bole kodzela a nee sika fotsa kakona otse, kĩ yaakoa ekona omato a, ye tunyukpẽ mo seebi a.

XVI Omato a deĩ foke ena, kĩ ye lesa mo ye lugo kame keti. Ode foto onyane a kona omato a mo ye fotsa kakona otse a. Emó kĩ seke moa te fusikũ apim moa mo oha elo (1,500). Omato a lesa, ye lugo mo ye akũ kadzela flee keti.

XVII Ode foto onyane a kona seebi a leme, ade se akũ kadzela nye foneta oha nviã mo ye ewua-avũ (216) ne ye fotsa kakona otse a onukpẽ a.

XVIII Bekoa boe kĩ bave Yaspa bekoa bike seebi a, ade bekoa sika ngbã kĩ se kame kpale nde ahuhoe aye bitsua omato moawe a.

XIX Bekoa boe aholo aholo kĩ bideĩ koya behehe omato a seebi kayokayi futekũ boe a. Litekũ letonyade a nye ahuhoe de kĩ bave yaspa, leyade nye safir, lelalede nye yalkedon, lenade nye smaragdo,

XX lilode nye sardonik, livũde nye sardis, livũkonode nye krisolit, lelẽde nye beril, livedide nye topas, liwua de nye krisopras, liwua-odide nye hiakint, ade liwua-nviãde a nye ametist a.

XXI Tunyukpẽ ewua-nviã a fulitsa bowa ewua-nviã. Litsabi bowa moape bekoa bekona onyukpẽ odi nye odi. Omato a oblonu nye sika ngbã, kĩ se kame kpale nde ahuhoe aye.

XXII Ntámọ asoli kọla nẹ ọmato a kame, kitonekĩ boe Ọlate Baguma Kpale mọ Kavelibi a nye ye asoli kọla.

XXIII Ọmato a tásì suwa kĩ seta ìye odeto kĩ evole nẹ ye kame, kitonekĩ Baguma kukũkpale nyé ye ọhaì ade Kavelibi a lẹme nyé ye ọsedza a.

XXIV Katinya kame bati aatsã ye haì kame, ade tite akũ fọgã aakọa be akũ kana fọtsa beyamena nẹ ye kame a.

XXV Beláabale ọmato a tunyukpě mọ suwa da, kitonekĩ kade leláado nẹ awã da.

XXVI Baakọa fude fude akũ obu fọtsa mọ akũ kana fọtsa beyamena nẹ ọmato a kame.

XXVII Lẹme letsa a kĩ de akũ tákpale lidima leláawo nẹ ọmato a kame. Ade odi nye odi kĩ yakena fonyọatsa ìye enye ọvãlevã lẹme leláawo nẹ awã, mbọente bati a kĩ betsele be buì bido nẹ Kavelibi a nkpã ovoli a kame aawo nẹ ọmato a kame.

XXII

Nkpã Ọwọ Mọ Nkpã Kutse a.

I Ke liti a, ode fọto ọnyane a tsa yì nkpã ọwọ kĩ ye mui akpa nkpã. Ye mui a kame kpale nde ahuhọe aye, ade bekanẹ kato Baguma mọ Kavelibi a legãkpo a kame,

II ade batě nẹ ọmato a ọblonu kayite a. Nkpã kutse a dzě nẹ ọwọ a futuni nviã akũ. Kọawũ babi titi ewua-nviã nẹ kateli mọa kame, nẹ odeto mọa kame deedi. Koe tọta bakọa katsa fude fude bati fọso.

III Beláabuki bemó letsa a kĩ Baguma dumu lidima nẹ ọmato a kame. Baguma mọ Kavelibi a

legãkpo aana ne omato a kame ade ye basumune aasum ye a.

IV Baamo ye ane ade ye di aana ne be nnye a.

V Kade lelãabuki kedõ ade belãasĩ osedza iye suwa, kitonekĩ boe Olate, Baguma aanya be ohaĩ, ade baanya akũ nde fogã aye daa daa a.

Yesu Kaya.

VI Ke liti a, ode foto onyane a bi yi kĩ, “Fõletsa kũ nye onokõali ade baapuli bete foe bido a. Boe Olate, onukpẽ banyene Hũhũ Baguma a lido ye ode foto onyane kĩ eyaanye letsa a kĩ laaya moatse a etsa ye basumune.”

VII Yesu le kĩ, “Midã! Maya moatse! Baguma hila bati a kĩ bakena ne ovoli kũ kame fõletsa a kĩ bele biyi a akũ!”

VIII Yi, Yohanes, nyé oti a kĩ ye linu, emo fõtsa kũ flee a. Kĩ nnu fukũ, mmó foe a, nke aduli ne ode foto onyane a kĩ enye foe etsa yi a ane kĩ masum ye.

IX Lemε ebi yi kĩ, “Takena foe! Basumune bõmó nõ, mo awaẽ ame Baguma onukpẽ banyene, mo bati a kĩ bakena ne ovoli kũ kame fõletsa akũ a boane. Sum Baguma odi!”

X Ade ebi yi kĩ, “Takõa fõletsa a kĩ bele biyi ne ovoli kũ kame a okõla, kitonekĩ loko fuã kĩ foe flee foya ne foe kame.

XI Odi nye odi kĩ yakena tokpa ni, edane tokpa kakena, odi nye odi kĩ yado akũ effĩ ni, edane akũ effĩ kado. Odi nye odi kĩ yakena tuwĩ ni, edane tuwĩ kakena, ade odi nye odi kĩ enye oti kpalewa ni, edane oti kpalewa kanya.”

XII Yesu le kī, “Maaya moatse! Maya mo yī kotokase, nkpa odi nye odi ne ye lekenana onukpē.

XIII Yī nye Ɔtonyade mo Owūnade, Kayokayi mo Kawūna a.

XIV “Bihila bati a kī bevole be tetadie wulaa tene fitaa a, kī ne foesū bidei osi kī banya nkpā kutse a babi, kī bidei osi leme kī batsā tunyukpē a kame biwo ne omato a kame.

XV Leme omato a obaē badzine nyé fonyoātsa bakenane nde bakpete aye, kanokone badāne, bikī betse moa linyolewe mo litsolewe, awudifo, baviō basumune mo bikī bawe fovā, kama fovā leme.

XVI “Yī, Yesu, lido yī ode foto onyane kī eyaadi adansie ne folets a kī akū ekpa mi ne tesoli a kame. Inye Dawid onu mo ye kasinu a kame obi, ade yī leme nye onone lisibii a kī lavole a.”

XVII Hūhū a mo Obolitsō a le kī, “Ya!”

Odi nye odi kī enu fukī ni, ele kī, “Ya!”

Odi nye odi kī omoado ako ye ni, eya. Odi nye odi kī yawe nkpā mui ni, eyaate be faa.

Folets a Kawūna.

XVIII Yī, Yohanes, mabi odi nye odi kī enu folets a kī bele biyi a, kī bide foe letsā ne ovoli kī kame a kī nte odi kōa litsedi ebumo foe ni, Baguma aakōa lubo kamō a kī betsele ne ovoli kī kame a ebumo ye soto kavele.

XIX Ade ayea nte odi nye litsedi ne folets a kī bele biyi ne ovoli kī kame a kame ni, Baguma aanye ye tsefā ne nkpā kutse libi a kame, ade elāana tsefā ne Omato Kpalewa a leme kame a.

XX Oti a kī yadi adansiε nε fotsa kīī flee akū a
le kī, “Oo, maaya mɔatse!”

Fɔya lomɔ. Boe ɔlate Yesu, ya!

XXI Boe ɔlate Yesu kɔnyakamɔ kɔtamɔ odi nyε
odi.

Baguma Apam Vɔɛ a Tɔwuli
Tɔwuli: Baguma Apam Vɔɛ a Tɔwuli New Testament
copyright © 2008 Wycliffe Bible Translators, Inc.

Language: (Tɔwuli)

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 28 Dec 2024 from source
files dated 29 Jan 2022

68df0193-2981-5275-8994-8f743fe01e5e